

# Babango: Bible for Luka

## Formatted for Translators

©2022 Wycliffe Associates

Released under a Creative Commons Attribution-ShareAlike 4.0 International License.

Bible Text: The English Unlocked Literal Bible (ULB)

©2017 Wycliffe Associates

Available at <https://bibleineverylanguage.org/translations>

The English Unlocked Literal Bible is based on the unfoldingWord® Literal Text, CC BY-SA 4.0. The original work of the unfoldingWord® Literal Text is available at <https://unfoldingword.bible/ult/>.

The ULB is licensed under the Creative Commons Attribution-ShareAlike 4.0 International License.

Notes: English ULB Translation Notes

©2017 Wycliffe Associates

Available at <https://bibleineverylanguage.org/translations>

The English ULB Translation Notes is based on the unfoldingWord translationNotes, under CC BY-SA 4.0. The original unfoldingWord work is available at <https://unfoldingword.bible/utn>.

The ULB Notes is licensed under the Creative Commons Attribution-ShareAlike 4.0 International License.

To view a copy of the CC BY-SA 4.0 license visit <http://creativecommons.org/licenses/by-sa/4.0/>

Below is a human-readable summary of (and not a substitute for) the license.

You are free to:

Share — copy and redistribute the material in any medium or format. Adapt — remix, transform, and build upon the material for any purpose, even commercially.

The licensor cannot revoke these freedoms as long as you follow the license terms.

Under the following conditions:

Attribution — You must attribute the work as follows: "Original work available at <https://BibleInEveryLanguage.org>."

Attribution statements in derivative works should not in any way suggest that we endorse you or your use of this work.

ShareAlike — If you remix, transform, or build upon the material, you must distribute your contributions under the same license as the original. No additional restrictions — You may not apply legal terms or technological measures that legally restrict others from doing anything the license permits.

Notices:

You do not have to comply with the license for elements of the material in the public domain or where your use is permitted by an applicable exception or limitation.

No warranties are given. The license may not give you all of the permissions necessary for your intended use. For example, other rights such as publicity, privacy, or moral rights may limit how you use the material.



# Luka

## 1

<sup>1</sup>Wato ngbi wakeli makasi té wakome sambo djinge ikelami la iso, <sup>2</sup>Ndenge iwo wango wandjali oweni la maiso wato komeli té la ebandeli ewo mpe wawumi wa minisite e loyi; <sup>3</sup>Mbai mpe idjwali mokano aloyi ibiliyali djinge sambo kpa té la ebandeli, te iyo dhingele la molongo owe Teyophila <sup>4</sup>Laate oyewe la meemene m tiasakoli enge etoti owe. <sup>5</sup>La tango e Helode, likumu e Yudeya, edjali la kanga Mwengei la kombo e Zakali, la litoto e yabiya, moli ondé adjali la oliye ewanawali e Aloni, adjali owelani Eli Sabatha. <sup>6</sup>Iwo kpa wadjali olamu la mayiso ma Mwengei wadjali odendeli la olamu mati ya sakoli la motomami e likumu. <sup>7</sup>Wati djali la wana, elizabeta atidjali owoti, iwo kpa wa wumali mbange. <sup>8</sup>Tango edjali Zakali okeli otomo o ende enganga Mwengei edjali ngonga ende, awona mali la djeke. <sup>9</sup>Mbuse ee Saselodose, la olingeli a Tepelo e likumu ate ohe palafé. <sup>10</sup>liwoke ewato edjaki saa la owangi, ngonga e palafe. <sup>11</sup>Anzeli likumu amowumelalia Zakali, aa moliya ngambo e lilome ehola e palafé. <sup>12</sup>Mamungo ma moyetali Zakali oyeni anzeli, alidji atumali la boo. <sup>13</sup>Kasi anzeli amowaselia: Otiwange Zakali, oloyi owangi oowe endimani. Moli oowe Elizabeta akowota mana opele; okomaha kombo e Yowana. <sup>14</sup>Akodja etie oowe ema e mwemu la alegrese wato ngbi wakoyemele la owatami onde. <sup>15</sup>Aloyi akondja mote mosungu liwoso e Mwengei atikenga vinyo, té masanga kpa engé ekolangwisaka, akotumisama la molimo satu té osali e nango. <sup>16</sup>Akowangosa wana wa isalayeke ngbi olikumu Mwengei owu. <sup>17</sup>Ako somba liwoso e Mwengei la molimo la okulu e Eliya, laate awongose mitema ewa wawa ngambo e wana wa ndjangi la kandela e meemene laate amowongele likumu wato wango wa koki. <sup>18</sup>Zakali aasiya la anzeli: ikoyewa nda ndenge? laate iwumiga mowange; alidji moli ombai masiyo mandé mpe makiya lihele. <sup>19</sup>Anzeli a mowaseliya: idjei Gabiliyele, ikowamalaka liwoso e Mwengei, itomani té iyo wasele, alidji iyo sumbele eele mboli ndamu. <sup>20</sup>Denda, oti gbuka kine, okowasa ndji lisiyo linge djinge sambo ekowuma, olikambo ati ndime maloba ma mbayi, engé ekohengemene la ngonga eho. <sup>21</sup>La engé ngonga, wato wadjali olambeli Zakali, la okomwi ndenge ewumweyindé ongo ndondo e Tepelo. <sup>22</sup>Tango epumbia inde, ati waaselali, wa yewali té ayeni saki ndondo e Tepelo, adjali owakeleli la maho, atikalali bubu. <sup>23</sup>Tango masiyo mande ma otomo masiliya, awongoliya atie inde. <sup>24</sup>Ma masiyo mbuse, Elizabeta, moli onde, awumali la lami, Aayisiya ndeboo itano, adjali owusi: <sup>25</sup>Edjei la ngolu likumu a kelali mbayi, olambi mayiso mandé likolo la mbayi laate alongose soni embayi liwoso la wato. <sup>26</sup>La sandja e motoba, anzeli Gabiliyele atomamali la Mwengei la moki mwesi mo Galileya, mowelami Nazaleta, <sup>27</sup>Atié mana omali mwesi atiyewali pele wose e moto mwesi la molako mo Davidi la kombo e Edjefu. kombo emana ongo otiyewe pele edjali maliya. <sup>28</sup>Anzeli alingeliya etié inde aasia ihoyi mbaa, owe ongo ngolu ewohekelami, likumu adjei la owe. <sup>29</sup>Emo etelali la enge eyaseli, maliya aahuwelia inga enge mbaa eyenga woni. <sup>30</sup>Anzeli amowaselia: otiwange; maliya; laate adjwi ngolu liwoso e Mwengei. <sup>31</sup>Denda, okokpala lemi, okowota mana pele oko mohu kombo e Yesu. <sup>32</sup>Akodja osungu, akowelama mana ongo oyeti likolo, likumu Mwengei ako moha ngbelengo e likumu e Davidi, sango. <sup>33</sup>Likumu lande likodja a molako mo Yakobo libela, alidji likumu lande liti la osali. <sup>34</sup>Maliya aasiya la anzeli: ekokelama nda ndenge iyewiti pele? <sup>35</sup>Anzeli amowongeseliya: molimo satu ekodja likolo e wowe, okulu enge eeti likolo ekodiha la elimo endé. ehonde mana osatu ongo oko wotama la owe akowelama mana o Mwengei. <sup>36</sup>Denda, Elizabeta, manguwa, adjei pe la lemi, mana mwesi la owange onde, ongo odjali iyo omoweli ekomba adjei la ndebo motoba elemi: <sup>37</sup>Laate ema teeti ekokiti odjangi atie Mwengei. <sup>38</sup>Maliya aasia: idjei motuke mo likumu, ekelame la mbayi ndandenge eyasi owo: anzeli omodeyia. <sup>39</sup>Ndi laenge engele, malia amalia, pe akeli obangu a moki mwesi dja mikoli mikoli aliwange mwesi dja wa Yuda. <sup>40</sup>Alingelia la monguta dja Zakalia, a mohekelia Elizabeta mbaa. <sup>41</sup>Ndjongo Elizabeta ayokali mbote malia, mana ayabandali a solo, pe atumali la molimo santu. <sup>42</sup>Inde apamali la moli mosungu: pe ahasali ate apambwamia kati e wali kpàa, pe pukapuka enge edjéi la solo epambwamia. <sup>43</sup>Nda wahaselia mbai ate nango likumu o mbai akodjaka ahue embai. <sup>44</sup>Denga, nda iyokali moli la mbote la owe a matoi mambai, mana ndondo esolo dja mbai ahumbwali la oemeli mingi. <sup>45</sup>Ohemeli edjéi la moli andimia, late sambo kpàa enge Mwengéi amohaselali wekokokisama. <sup>46</sup>Pe malia ahasali ate: molimo mo mbai ekokumisaka Mwengéi. <sup>47</sup>Pe elimo mombai ekoki ti oya tonesi ohemeli mingi a tina e Mwengéi, mokalesi mo mbai. <sup>48</sup>Nda oheni ate motuke monde omoli adjéi moto pamba. Denda, obandi sikalandjo mabota kpàa wakotolo mbai moto o mwemu. <sup>49</sup>Nda moto okulu akelelia mbai misala misungu, pe kombo ende edjéi mosatu. <sup>50</sup>Magba ende edjéi likolo la wato wango wa komowangaka inde mabota la mabota. <sup>51</sup>Akelia la okulu a mawo mande; awahandia wango wadjéi la elolo a mamungo la mitema mawu. <sup>52</sup>Awadimbia wato wa okulu a kiti dja makumu, pe awadjambia wato pamba. <sup>53</sup>Atumesia wato wa ndjala la wihoo wilamu, pe awongosia wato wa ogumake mawo ohola. <sup>54</sup>Adia osalesi Isalaele, mokeleli monde, late amungole aleti motema magba lende. <sup>55</sup>Nda ahaali lawa wawa wasu, atie Abalayama la momboto monde libele. <sup>56</sup>Malia ayabatali ebete kikima la Elizabeti inga sandja isato pe awongwali ebete ende. <sup>57</sup>Tango enge Elizabeti ekokali ate awote pé awotali mana opele. <sup>58</sup>Wato wango wa lisukaka la wo wonde wayokali ate Mwengéi amosu moli inde motema mo magba, pe wabandali ohemeli ebete kikima la inde. <sup>59</sup>La lisio la mwambe, wamotenali mana oho kombeni pe amowelali Zakalia, nkombo e sango onde. <sup>60</sup>Kasi nango adjali la loi woasaka, ahasia: te ndjongo, mowelakani ate Yoane. <sup>61</sup>Ndjongo wamohaselali inde moto mwesi a libota la owe ati la enge kombo. <sup>62</sup>Ndjongo wamowelia sango onde la wilembo inga abali wamowe ndai. <sup>63</sup>Zakalia awongoli makoti, pe adingali: kombo wende Yoane. Ndjongo iwo kpàa wakamwali. <sup>64</sup>Ambala wadi monoko monde modukwamali, pe olemi onde opumbali, abandali owasi, pe opamboli Mwengéi. <sup>65</sup>Wato kpàa wango wadjali oyabati alisukaka ewu wawangali, walandali ohaseli sambo kpàa. Enge a moki mosungu dja mokoli mo Yudea. <sup>66</sup>Pe wato kpàa wango wayokali eho wahisali a mitema ewu, pe wandjali ohasi: ohola mana akondja ndai? late

ewoo la Mwengéi edjéi penza la inde.<sup>67</sup> Zakalia, sango onde, otimali la molimo mo santu atiesakolali ate.<sup>68</sup> Opabwame Engali, mwenge o Isalaele, nda akebesi ga wato wande la owa sikoli iwo.<sup>69</sup> Atopumbeselio iso ndjeka dja mokalo la monguta mo Davidi, mokeleli onde.<sup>70</sup> Ndi nda ndenge eleholi inde a monoko la mowasakoli wande gala.<sup>71</sup> Ate akotokalesa iso awanguna wasu pe mawo la wango wakototonaka iso.<sup>72</sup> Late atohinye iso motema magba a tina ewa sangbasu pe amungole aleti ondimani onde mosantu.<sup>73</sup> Nda ndenge amola Pelali sangbasu Abalayama.<sup>74</sup> Late akeke otópumbesi, mbuse tolongwe a mawo dja wanguna wasu, tomokelele inde otomo esatu la owangi te.<sup>75</sup> Osombi liwoso lande la osembo pe la omowangi masio kpàa a bomoi wose.<sup>76</sup> Owe, mana mokeke, okodja owelami motiesakoli molikolo; angò okosomba liwoso la elongi e Mwengéi la owongeli mboka ende.<sup>77</sup> Mbuse ohekelì wande kandela ate akowakelesa a mboka e olimbisi masumu mawu.<sup>78</sup> Atina magba e Mwengéi osu, la tina magba maho tokohene liwusawuse opumbi tokodendaka likolo.<sup>79</sup> La ekeli wuse la wato wango wa sese a wango wamotulu la wango walihohela la logo. Atina osombesi mangbanda masu mboka e logo.<sup>80</sup> Kaikoase mana oho adjali obeki aumia la okulu la elimo adjali ndi la manganga tee lisio enge eyahiniali liwoso la isalayelee.

## 2

<sup>1</sup>Engé e mobeko mose zale ogisitè wakele tange wato wa moki kpa. <sup>2</sup>tango e liwaso edjali tango kilinisi likumu e silia. <sup>3</sup>Watokpa wakeli oyakomesi, moto la moki monde. <sup>4</sup>Edjefu indé mpe ateliya a galileya, alongoya nazalette, akiya a yudeya, la moki modandi, betelema, aloyi adjali la molako alidji la oliye o Davidi. <sup>5</sup>Laate ake owakomesi iwo la molia, wasé onde, adjali elemi. <sup>6</sup>Tango edjali iwo ongo use enge malia akokali ogboti ounia, <sup>7</sup>Awotiyu mana onde oliwoso opele. Amolingiya, amolangesiya la elakeli ewa meme, aloyi eti djali la ebete la iwo owa buti a ndako efutelake. <sup>8</sup>Edjali nde lenge ehòlo, wa wokoli wa meme wa djali alokolo wakobate laka nama djawu. <sup>9</sup>Denda, anzelu olikumu awawumeliya, kembo eli kumu ewalingia. <sup>10</sup>kasi anzelu awaaseli: otiwa ngeni, ekodja la wato kpa ema emwemu; <sup>11</sup>Keke, a moki modavidi, mokalesi mowe aowata melini adjei, adjali kilisito, likumu. <sup>12</sup>Denda enge elembo eko yewani ino: okogbotoni mana mwesi wa molingi alidji alangali a elakeli enama. <sup>13</sup>Ndi lenge ngonga ongo anzelu aboliani la weeta wanzelu, wa mokumisia, mwengei waasia; <sup>14</sup>Kembo e Mwengai oyeti likolo, logoo a mbume la wango wadjei la mi tema milamu. <sup>15</sup>Tango waatikia wa wongoyia likolo, wa wakoli meme waa sania: toke tee ongo a beteleme, to dende enge ewumi ongo; enge likumu otowewisi. <sup>16</sup>Wakia obangu, wagbotia maliya la edjefu, la mana mokeke alangali la elekeli e nama. <sup>17</sup>Mbuse e weni, waasia enge ewaaselli iwo la loyi loowolo mana mokeke: <sup>18</sup>Iwo kpa watumia la okamwi lenge edjaki wa wokoli wa meme owaaseli. <sup>19</sup>Malia adjali oyisi djinge sambo kpa, adjali obundoli a motema. <sup>20</sup>Wawekoli wa meme wa wongwali, la kembo la omokomisi alidji lenge eeni iwo, eengemani leenge ewa waselali. <sup>21</sup>Masiyo mwambi, laate mana atename kombeni, wa mahia kombo Yesu, kombo enge easali anzelu liwoso te mana a lingeli a solo e nango. <sup>22</sup>Alidji, tango masiyo ma opetolami e kokali, ndende mobeko mo Moize, Edjefu la malia wakali la inde a yelusalema, laate wa mo inye la likumu; <sup>23</sup>Ndenge edhingami la mobeko e likumu, Mana ongo opele ongo owotami liwoso wa mohe la likumu, <sup>24</sup>La ohekelì likabo ilwa iwale, ndandenge edhengami la mobeko e likumu. <sup>25</sup>Denda edjali Ayelusalema moto pele mwesi nkombo ende Simeona, moto ongo adjali sombi olamu pe mowangi, adjali olambeli obondisami dja Isalale, pe elimo santu edjali likolo lande. <sup>26</sup>Aleeti amohiniali a mboka elimo santu ate atahene logo liwoso amohene Kilisito e Mwengei. <sup>27</sup>Adjali a tepelo, la okulu dja elimo. Tango waboti walingesalia la mana mokeke Yesu laate a mokelele inde ndenge wingbundu ewongi. <sup>28</sup>Inde amototali a mawo mande apambolali Mwengéi, mpe ahasia. <sup>29</sup>Sikalandjo Mwengéi, owe odeiya motuke wowe ake la logo, sa ndenge ohasali. <sup>30</sup>La tina maiso ma mbai eheni ndja mokalesi. <sup>31</sup>Ongo ewangeli a maiso la wato wa miki kpàa. <sup>32</sup>Wuse late ehenese miki, pe kembo la Isalaele, wato wa owe. <sup>33</sup>Sango la nango wadjali ndi okamwi la sambo kpàa enge wadjali owasi a tina ende. <sup>34</sup>Simeona awapamboli iwo ahasali la malia, nango: Denda, ohòlo mana ayabati a tina olumbesi pe oyamalesi wato mingi la Isalaele, a tina edje lembo enge wato wako aselaka obe. <sup>35</sup>Pe laowe mene ewuni mosungu ekoswa molimo mo owe late mamungo ma mitema mingi ehenene. <sup>36</sup>Edjali pe la moeni omoli, Ana, mana o Fanwele, la libota Ashere. Moli oho ahumali la mbula ngbii pendja, pe ayabatali la molome onde mbula sambo mbuse oyikani atikalali onde. <sup>37</sup>Dja ndi mogweli molome, pe la mibu tuku mwambe la inéi, atiumali a tempelo, ayahekeleli la Mwengéi likolo la wuse ndondo owakilisi la oyakomgi. <sup>38</sup>Mamungo mawongwea, inde kine ndi la hengele ehoo, akumesia Mwengéi, pe akohasaka atina e Yeu atie wango kpàa wadjali olambeli osikolami dja yelusaleme. <sup>39</sup>Ango wasilisalia okeli sambo kpàa la otutei wingbundu wa Mwengéi, Josefú la malia wawongwali la Galileya, ongo la Nazarete, liwange ewu. <sup>40</sup>Kaiko, mana ohoo adjwali obeki la okulu, atumali la okenge, pe libalano e Mwengéi edjali likolo lande. <sup>41</sup>Wawoti wa Yesu wadjali oki mbula kpàa a Yelusaleme, la lipati la pasika. <sup>42</sup>Ango eumesi inde mibu liomo la iwale wakeli a lipati ehoo ndi ndenge wamesanali oki. <sup>43</sup>Aleti, angò masio epotoli oweti, wawongwali, mana Yesu atikalali a Yelusaleme. Sango la nango watiyewali. <sup>44</sup>Wakanisali ate adjali la ebiba wato wango wadjaki okeli la iwo konde, wasombali lisio mobimba. Mbuse ehoo wabandali omolukani atie wato wa libota pe atie wato wango wayewani la iwo. <sup>45</sup>Ase, nda watimoheneli inde wawongwali a Yelusaleme la omolukani. <sup>46</sup>Mbuse e masio masato, wamogbotoli inde a tempelo, ayabati ndando e watiesakoli, wamo mo yokaka pe akowa huelaka oopo. <sup>47</sup>Wango kpàa wadjali omoyoki wadjali sa okamwi a mayele mande la ewongweliseli onde. <sup>48</sup>Ango wawoti wande wamohenia, wakamwali, nango amohaseli ate: Mana ombai, otokelia iso ndjo la tina ende? denga, sangwa la mbai tosombia moto oolukani. <sup>49</sup>Ase inde awahaseli ate: a tina ende ino okolukakani mbai? ino woyewitini ate mbai ikokelaka sambo dja wawa? <sup>50</sup>Ango watiyewali enge ekowaselaka iwo. <sup>51</sup>Ase adimbali ebete kikima la iwo la oki Nazarete, pe adjali ndi oyadimbisi liwoso lawu. Nango abaniali dinge sambo kpàa a motema monde. <sup>52</sup>Pe Yesu abekali la kondela, pe la wenge la libalano, liwoso e Mwengéi pe liwoso la wato.

### 3

<sup>1</sup>Mbuse e liomo itano likumu wonde mokondji Cezar, angu mpe Pilato adjali Gouvelenele a Yudeya Helode likumu e Galilayi, manango Philipo likumu e Iture etuka e Talakonite, Lisaniasi likumu e Liabilene <sup>2</sup>Masio ma nganga e Mwengei likumu Anna e Caipe moaseli mo wawa amoaseliya Yoana mana o Zakali ndondo e manganga. <sup>3</sup>Angu osombaki a moki mosungu kekelele e yoluanu adjali osakoli patisa enge edjei elembo e okukoli motema alikambo la olimbisi e masumu. <sup>4</sup>Ase angu edingami la buku esaseleli e Isaya: moli e moto mongongo manganga akopamaka la motulu wongeleni mboka e Mwengei. <sup>5</sup>Mawela kpa ekodhikana, wa mikoli kpa miko adjimba enge wa bebesaki eko wongo, mboka enge wa bebesake mako wongo. <sup>6</sup>Aleeti wenge kpa ekohene ondimi e wawa. <sup>7</sup>Adjali owaseli wato ngbi wango wadjali ototi patisimo atie inde: wana wa ndjoo, ndai owoyinyei otoli limeme ligeleli? <sup>8</sup>Inyani misala ma okukwami, otiabate oasalani ino amene: todjei la Abalayama nda tata? iyo waseleni la lingelibukeli Mwengei akokiopumbesi weeti wana wa Abalayana. <sup>9</sup>Engboma eyabatiga la masisa mo mote: mote mungo mokowota mbuma mbée wa tene walumbe la misa. <sup>10</sup>Wato ngbi, watomia, waasa: tokoki okeli woni? <sup>11</sup>Awawongoselia ongo odjei la wisidje iwale amowekele ongo odjanga, ongo adjei la ema e lakake akele ndi ndjongo. <sup>12</sup>Wa putesi pako wadjakali la ototi batisimo, wa moaselia: molakesi, nda ndenge koki iso okeli? <sup>13</sup>Awawongoselia otiwonge likolo enge easamiali ino. <sup>14</sup>Wa soda mpe wamowelia: iso, nda ndenge ekoki iso okeli? awa wongoselia: otitoni ema e mo la otetelake la oyiwi wato, e melani la liputi lanu. <sup>15</sup>Sikandjo nda ndenge wato wadjaki omolambi mpe wadjali owaweli iwoamene a mitema mawu eeti tango Yoana ase adjei Masiya. <sup>16</sup>Awawongoselali aasi la iwo ate mbai iko obateseniino a malia moto mwesi motetelake o eti mbai akodjaka. ehongiti odukoli miliki ma ikpokpo ende, inde akobatisa ino la elimo satu mpe la misa. <sup>17</sup>ende epoli mbuma edjei la ewo ende a likambo la opetoli amene ebete ende e otangi mbuma mpe ogbotonesi a molako monde mungo moisake ilaka ase akotumba mposi ewo la misa mungo motolimanaka. <sup>18</sup>Angu Yoana adjaaki owalendisi wato weeti sungu mpe owa sumbeli mboli mdamu. <sup>19</sup>Ongo yowanu adjali omotekesi ati moyike Helodias moli o maanango alidi la sambo mbe ekelali inde. <sup>20</sup>Helode abakisali alidi odjeti sambo enge omonangaki Yoana a boloko. <sup>21</sup>Kaiko nde engele wato kpaa wa batisamaki Yesu mpe abatisamaki angu engele adjaaki inde ohakongi likolo edukuanaki. <sup>22</sup>Djimbela nda ebenga elimo satu emwa ase mooli mookali likolo e asia: odjei mana ombai olibalano iyobali ngbii. <sup>23</sup>Yesu engele ebanda te inde otomo wonde adjaali la mbula tuku isato wa djaaki okenesi ate adjei mana e Yozefa, mana ehele, <sup>24</sup>Mana e Mateo, mana o Melesi, mana Yanayim mana o Yozefu. <sup>25</sup>Mana o Matatiasi mana o Amosa manao naumama, mana o Elisi, mana o Nagayi. <sup>26</sup>Mana o Mahata, mana o Matatiasi, mana o Semeyi, mana Yosesi mana o yuda. <sup>27</sup>Mana o Joana, mana o Lena, mana o Zolobabel, mana o Satakiti, mana o Neri. <sup>28</sup>Mana o Melaki, mana o Adi, mana o Kasama, mana o Alamadama, mana o Er, <sup>29</sup>Mana o Yesu, mana Matha, mana o Levi. <sup>30</sup>Mana o Simeo, mana o Yuda, mana oYozefu, mana o Eliakime, <sup>31</sup>Mana o Melea, mana o Mena, mana o Malata, mana o Nata, mana o Dawidi, <sup>32</sup>Mana o Isaya, mana o Jobede, mana o Boze, mana o Salomo, mana o nama, <sup>33</sup>Mana o Aminadabe, mana o Adime, mana o Alani, mana o Esilome, mana o Falese, mana o Yuda, v 34 Mana o Yakobo, mana o Isaka, mana o Abalayama, mana o Otara, mana o Nakore, <sup>35</sup>Mana o Serite, mana o Rago, mana o Fale, mana o Ebere, mana o Sala. <sup>36</sup>Mana o Kaina, mana o Afasa, mana o Seme, mana o Nowe, mana o Lamete, <sup>37</sup>mana o Matisala, mana o Enoki, mana o Jolede, mana o Malele, mana o Kaina, <sup>38</sup>Mana o Enose, mana o Adama, mana o Mwengei.

### 4

<sup>1</sup>Yesu atumesamia la molimo satu olongoya la Jordani pe molimo mo motomia ongo odjaka manganga. <sup>2</sup>Ongo omekehekeni la esisi masio tuku inei wuse la likolo odjanga olaki kati emango masio ndjongo, mbuse emango masio ndjongo aokia djala. <sup>3</sup>Esisi a mwaselia ndjo: Inga odjei mana o mwengéi, asa la ma mabukeli makukwane makoke. <sup>4</sup>Yesu amowongoselia ate: madingo masiate: moto atikalaka sa la ilaka ilakake. <sup>5</sup>Esisi emotombolia likolo la mokoli, amoineisia okondji o mbume. <sup>6</sup>Mpe asia lainde ikohekele u otetelake, la okumu ehele moki okodji, late waheli mbai, ikoki ohi la moto ongo omobali mbai. <sup>7</sup>Pe inga oya kongu la mbai, mbai ikohekele uwo. <sup>8</sup>Yesu amohongoselia: longua longuango Etota! madhingani moasi ate: okoki omongumbameli la omokeleli ndji likumu mwengei oowe, <sup>9</sup>Esisi, emototia ekia lainde ongo la Yelusalem, amoyamalesia likolo la tempelo mpe asia aleti: inga odjei mana mwenge alumba yo ongo sésé late edingami djongo. <sup>10</sup>Akohekele mitindo edje wadjelu la tina owe late wobatele. <sup>11</sup>Pe wakokpala la mawo mau late makolo maowe ma titime hesele. <sup>12</sup>Yesu amowongoselia: easani ate itikoke omomeki likumu Mwengéi. <sup>13</sup>Mbuse omomeki la sambo ebele esisi emotilia, Yesu atikalala inde. <sup>14</sup>Yesu atumesamia la otetelake molimo awongoya a Galilea, mpe mboli ende eyandjia la miki mango ma kekelele. <sup>15</sup>Ateyakali la Sinagoga, pe okumu wonde osombia ibete kpaa. <sup>16</sup>Awongoia la Nazareth amoki mungo mobekalinde, okokani la okoko owu alingelia la Sinagoga use oyenga ayamalia late atange buku. <sup>17</sup>Pe wamohekelia buku e mosakoli Isaya: ohengesia kasi dja buku akadjua ebete esi ekomate. <sup>18</sup>Molimo mo Mwengei modjei likolo la mbai, late amunoli mbai la maita late iteye sango ndamu etie watundake atomi koto mbai ate ikalese wato wango wadjéi la mitema mikodjoi. <sup>19</sup>Late tuke ikangolame, wango wakpi waiso waene ate, wango wako nyokwamaka wakale, alidji la otiesakoli mbula eheli e likumu. <sup>20</sup>Mbuse eho adikia madingo amongoselia mosali, mpe ayabatia. Wato wango kpaa wadjakalia la losambo wa kukolia maiso atie nde. <sup>21</sup>Pe abadia owaseli: keke eheli djinge sambo ilongoiya mbaio otangi makokesamioa kekehele. <sup>22</sup>Wato kpaa wadimia misala mande, pe wakamoya la maloba mango makumaka la monoko monde: wadjali owasi ate Teolo nde mana o Yozefu. <sup>23</sup>Yesu awaaselia okowaselani mbai ehele lisekpe: monganga akalesa owe amene, alidi okowasani la mbai, kela ala la moki moowe djinge samboeyoki iso okeli la Kapelenauma. <sup>24</sup>Pe abakesia asiate: iwaselini meemene mosakoli te mokikima wakokio mondinaka la moki monde. <sup>25</sup>Ikowaselakani meemene: edjakali latango e

mosakoli Elia wali wa gbelete pele ngbii la Isalaahale tango edikamali likolo ilanga isato la sandja motoba, edjakate la odjangi wilaka la moki mobimba. <sup>26</sup>Tango eho Eliya atitomanaate ebete tweti la wango wali molongose ndi moli ongo gbeleli molome ongo la Saleta la moki mo Sidon. <sup>27</sup>Edjakate la wato ipuisi la Isalayelega enge hengele e osakoli Elisa, tweti la iwo ati peto la mite molongose ndi Namana oto o Siliya. <sup>28</sup>Iwo kpaa wamemelia la sinagoga tango okia iho djinge sambo. <sup>29</sup>Wayamalia, pe wa humbwa la inde la moki, pe wakia lainde te la songe mokoli e liwange ongo omaliwo monguta, pe wawongoia lainde obangu te ongo sésé e mokoli. <sup>30</sup>Kasi Yesu aetia ndondo ehu pe akia. <sup>31</sup>Ayadjimbua la moki mo Capelenauma la liwange la Galile, pe abandia otei huse o Sabata. <sup>32</sup>Wakamwali la mateya mande odjali otei nda moto odjei la okumu. <sup>33</sup>Edjakali la ndondo esinagoga moto mwesi odjakali la molimo mbe ambandali ohumbi pui makai. <sup>34</sup>Nda loyi edjei atie iso la owe: Yesu o Nazelete owe odji ate otowungese, iyoyewi olamu odjei mosatu ongo Mwengei amotomi. <sup>35</sup>Yesu amokelia minga, pe asia: dika monoko mowe pe pumba atiello moto esisi emolumbua ndondo e losambo pe mopumbua ndondo ende odjaki omokeli obe. <sup>36</sup>Wato kpaa wawangia, wabadjia wasani osu sambo eyinye woni? akohumbaka la isisi pe yo mowanganga! <sup>37</sup>Mboli ende ebengea la moki mobimba. <sup>38</sup>Opumbi wonde la Sinagoga akia la monguta mo simo. Okio osimo adjakali la fefe, wamwaselia likambo laho. <sup>39</sup>Oyakukolia ngambo ende pe aumbia la fefe eho fefele emosilia mbala kikima, pe ayamalia pe abadiaomosalali. <sup>40</sup>Mbuse ehuse oli wakadjia la wato wa ikoni ndenge la ndenge, pe awabatelia mawo mwesi la mwesi pe awakalesia. <sup>41</sup>Milimo mbe mipumbua edje wango wato wadjali ohumbi pui la owasi: odjei mana o Mwengei, Awa kelia matata, abalakali ate wakpome late minge miliko miwakali ate inde adjei kilisito. <sup>42</sup>Tango etania huse, apumbia akia ebete e manganga. Wato engbii wabandia omoluki, tee waka mokpotia watibalakali ate wakabuane lainde. <sup>43</sup>Awaseliala ate: ewongi pe ike Ameti miki la okatei mboli poli e Mwengei, late la tina eho nde etomami mbai. <sup>44</sup>Ndjongo abandali otei iholo kpaa la wasinagoga e Galilea.

## 5

<sup>1</sup>Tango Yesu aumali kelekele e ligbutu e Nazelete, mpe wato ngbii wayandogbali ongo edjaali inde la ooki luundo o Mwengei, <sup>2</sup>Aenia keekele emalya maamasula keekele iwaale, ndjongo wato wanduki wayadjimbua la okpoli witanga. <sup>3</sup>Atelya la wato eesin enge edjaaki Simoni, amoongia ate andongbe waato lihele e mbume, sikandjo ayabata, mpe ango la wato abandia owateyiawato. <sup>4</sup>Ango etime inde la waasi, aasia la Simoni: yandongba ongo ebeki malia, mpe lumba itana eowe la malia. <sup>5</sup>Simoni amowongweselia: moteisakoli, iso tokeli otomo likolo kpaa tooliti ema; kasi, la luundo wowe, ikolumba etanga. <sup>6</sup>Alumbua etanga, atotia suu sungu, mpe etanga eatia. <sup>7</sup>Wawelali wiino wahu wango wadjaaki la eeti waato la odii oasungi wadia mpe watumesia djinge waato waale, elukali olindi. <sup>8</sup>Ango eenia iwo ndjo, Simoni Petelo, akpia la mauili ma Yesu, mpe aasiandjo: otiyatole la mbai, la loyi atembai idjei moto omasumu. <sup>9</sup>Iwo la wato wango wa djali la inde la wato waumali la owangi la likambo la djinge suu eolali iwo. <sup>10</sup>Wadjaki iwo amene Zaki mpe la Yoani mana o Zebedeyo, watingali mongindi la Simoni, ndjongo Yesu aasia la Simoni: otiwange te, obandi keke okodja molobi ma wato. <sup>11</sup>Mpe wandimbua waato kondolo, wa dheya kpaa, mpe wa motuteya. <sup>12</sup>Yesu adjali la moki mosungu eesindjoo, mpe denga, moto mwesi mokwe la ekoni embala, a moenia, amomaelia mauili, mpe amwaselia aya kongia lainde: likumu lambai, inga obala, kalesambai. <sup>13</sup>Mana o Mwengei amobatelia mawo, amohelia, aasia: kala, ndji la enge tango ekoni embala emosiha. <sup>14</sup>Alaho amotelesia ate atiasela moto tweti. kasi, keke oya inyeli la watuke Mwengei, mpe waha likolo la tina e mokalo mowe oengemeni la mandingo ma Moyize, late enge ema ewandimese. <sup>15</sup>Otwa onde obangiali la moki, mpe wato ngbii wadjawali odji la omooki mpe late wakale la wikoni djau. <sup>16</sup>Aseko inde, aya lomolali akia la manganga, mpe aya kongali. <sup>17</sup>Lisio liesi Yesu akoteyaka, wafalizayo mpe la watiasakoli wa mibeko wadjali ango wayabati, wadii ongo la wato waGalileya, la wa Yuda mpe la wato wa Yelusaleme; mpe okolu e likumu edjei waneni la okalesi. <sup>18</sup>Mpe denga, wato, wamodjeleli moto ogui makolo alangali la litoko, wakolukakali omolingesi la omobati liwoso e inde. <sup>19</sup>Nda ndenge edjangali holo emolingesake la loyi e kaka e wato, watelali likolo e molako wa soyia wa modjimbesia la litoko lande liwoso la Yesu. <sup>20</sup>Yesu aenia andimi owu, Yesu aasi: manima, masumu mowe malimbisami. <sup>21</sup>Wa tiasakali mibeko la wafalisayo wabandali omungoli mpe la waasi: oholo ndjo adjei, ndai ongo okoki olimbisi masumu, eti ndi Mwengei inde amene? <sup>22</sup>Yesu, ayewaali sambo dinge emungolaki iwo kpaa, atotia liloba mpe awahuelia: nda sambo emungolaki ino a loho eino? <sup>23</sup>Ndaeema ongo edjei pete, okoki waasi: masumu ma oye malimbisane, te waasi ate yamala, mpe somba? <sup>24</sup>Laate ayeweni ate mana o moto adjei ala ambume la okulu olimbisake masumu: mbai yoluhuelini mboka, ase la moto obukanaki makolo, oyotomi aasia la moto ogui ma kolo, omalakola litoko lowe keke la makolo mowe. <sup>25</sup>Ongo moto oyamalali, ndjinge wako mweneki watotya litoko lilangalaki inde, mpe akia la molako monde, amogumei Mwengei. <sup>26</sup>Iwo kpaa wadjaali la oyahueli, mpe wa mogumeya Mwengei, watumisamiali mwemu, wabandi waasi lainde: iso tweni keke sambo dinge yeenekiate iso. <sup>27</sup>Mbuse eeho, Yesu apumbua, mpe aenia mo putisi pako la kombo e Lewisi, moto aabotali la molako mo putesaka la inde ate: tutia mbai. <sup>28</sup>Mpe, adheya kpaa, ayamalya, mpe amotuteiya. <sup>29</sup>Lewi amohekelali wilaka wisungu ongo la molako monde, mpe waputesi pako ngbii weeti wato walakali ebete eikima la inde. <sup>30</sup>Wafalisayo mpe la wadingi wabandia ondungwani, mpe waasia la wa tutiani ate: nda ndenge ekolakaka ino mpe la okengi la waputesi pako mpe la wato wango wakokalaaka obee? <sup>31</sup>Yesu, atotya loyi, aasia laiwo: etii wango wakokalaaka olamu nde wadjei la posa e okali, kaasi wakoni. <sup>32</sup>Mbai iditii owaweli wato wolamu kasi oweli wato wabe ate wa kukoli ekelelisia lande wayekoli wa Yoani la wango wa Felisayo wakokilaka wilaka, wa Yakobo mbala la mbala, kasi wango waowe wakolakaka wa koke ngaka. <sup>33</sup>Asi la iwo: wayekoli wa zaa, nda wango wa falizayo, kilani wilaka la enwenwe mpe la oyatoti, tee eko enga mwengele lakake mpe la okengi. <sup>34</sup>Yesu awawongoselia: inga owe la wato la fete e liwala okokini owa okokini owalangalesi ndola ndji molome oliwala adjei ongo? <sup>35</sup>Kasi masio wakolongola molome ndondo ewu wakokila wilaka

mango masio.<sup>36</sup> Yesu aawahali lisekpe liesi moto tweti atitotaka esuki e esindje ehola laate abambe esindje egala inga okela ndjongo abetesi esindje ehola alidji esuki esindje epoli eengemeniti la esuki e esindje egala.<sup>37</sup> Mpe moto tweti atabonge mana moholi ndjongo la mokeba mo gala, tee inga mana maholi ma kwaate mokebe, ekosuakana, mpe mokeba mokobitane; <sup>38</sup> Kaasi ewongi obongi mana la mokeba moholi. <sup>39</sup> Alidji moto tweti atibalaka okenge lihoso, maana magala mbuse maana ehola, inga ndjongo okoasa ate: Magala maeti maana poli,

## 6

<sup>1</sup>Easemia,wusé wo sabato ewelami mbuse la poo ase Yesu akpandesania la wilanga wa bule. Watutiani wandé wadjakali olongosi poso asé walaka,mbuse eodjipakisi la mowo. <sup>2</sup>Wafalisai wadi waasia la indé nda likambo likokelaka ino sambo ndjingé ikokiti okelani wuse wo sabato. <sup>3</sup>Yesu awawongoselia: otitangalini nda ekelali Davidi, ango emwanali ndjala, indé la wato wango wadjakali indé la iwo; <sup>4</sup>Woni nda elengelali inde la monguta mo Mwengei, aotia wokoke wungo woindjake, alakia, awahekelia wango wadjakali iwo la inde, wungo wotelesami ate moto atilake,ndji wanganga wa Mwengéi wakoki olaki? <sup>5</sup>Ase awaselia: mana omoto andjéi menemene e sabato. <sup>6</sup>Eumia, wodi wuse wo sabato, ase Yesu alingelia la sinagonga, ase abandia otiesakoli amogbotia moto mwesi ewo ende ekakati. <sup>7</sup>Wadingeli la wafalisai, ate wa momeke Yesu inga akomokalesa moto wuse wo sabato: edjali ngonga ate waluke ndenge eomokawi. <sup>8</sup>Kasi aewali mamungwene mawu, ase aasia la moto ongo djali la ewo ekakati: amala ase, ase abata ango la wodja. alongoya, ase amalia likolo. <sup>9</sup>Ase Yesu awaselia ate: iyohuelini inga edjéi wolamu omokalesi moto wolamu te, okeli olamu to okeli obe lisio la sabata. <sup>10</sup>Ase,awadedia iwo kpàa, aasia la moto ongo: nanola ewo owe. akelia ndjongo, ase ewo ende ekalia. <sup>11</sup>Wamemelia makasi, wabandia waasani iwo la iwo nda ema ekomokela iwo Yesu. <sup>12</sup>La enge engele,Yesu akia la mokoli okaakongi,ase akelia ongo likolo mobimba woakongi la Mwengei. <sup>13</sup>Ango otaniani wuse, awawelia watutiani wande, ase awonia liomu la wale, wango wawahali inde nkombo. <sup>14</sup>Simoni wamoweli petelo, Andele,manango; Yakobo; Yowane;Pilipo; Batelemi. <sup>15</sup>qwer <sup>16</sup>Yuda mana o Yakobo, la Yuda mokeliota ongo motambali. <sup>17</sup>Adjimbila la iwo mongindi ase aamalia la ebetesi edjei wolamu, ango odjakali ebele ewato la watutiani wa nde la ebele ewato wango wakalongwali la Yudea, la Yerusaleme, la moki e Sidona.wadjali la likambo la omooki la ate wakale la wikoni wau. <sup>18</sup>Wango wadjakali okwesi la wisisi wibe wakalali. <sup>19</sup>Ase wato ngbii walukia ate wamopote wenge, alikambo ate wokulu wungo madjakali aatie ende madjakali owakalesi iwo kpaa. <sup>20</sup>Ango ndjoongo Yesu,alongosia maiso awadendia watutiani,aasia ate: Mwemu la ino wango wa ndjangi nde wokumu wo Mwengéi wodjei la ino. <sup>21</sup>Mwemu la ino wango wandjei la ndjala ango ino okogbetani mwemu la wango wakolelaka sika ahala ango ino okwemele. <sup>22</sup>Mwemu la ino ango okotonakaniwato, ango okoumbaka iwo la ino la otangakoli ino,la obitesi nkombo ndamu, la Mana omoto nda odjéini wato wabe. <sup>23</sup>Emeleni la wungo wuse, ase humbwahumbwani la woemeli, denda lisute lanu lisungu lindjéi ongo likolo; nde ndjoongo ewakelakali iwo wasangbau wawakela waaseli. <sup>24</sup>Kasi magba la ino,wato wagumake,alikambo ate okondjini walamu wonu kpàa. <sup>25</sup>Ase magba la ino wango wagbeti ase mbuse okookani ndjala. <sup>26</sup>Magba, ango okowaselakani wato kpàa wolamu, alikambo ate endjéi sambo ehenge nde watata wau wadjakali woasi la waaseli wa moleho. <sup>27</sup>Ase ikoaselakani ino wango wokoyokakani: balani wanguna wonu, wakelani olamu; la wango wako otanakani. <sup>28</sup>Pambolani wango wako lakelakani obe oyakongila wango wakotangakani ino. <sup>29</sup>Inga moto aobinga la likeke mwesi moekeli eti ase motongo a opwesi mokoto elikolo otitone mohekele te esindje enge sese. <sup>30</sup>Mohekele moto kpaa ongo ohongi iwe ase inga moto a opwesi iwo wowe oti wonge ate ahongwesele. <sup>31</sup>Aleeti ndji nda nbdenge ino okobalakani wato waheokeleni ino kekelani iwo ndji ndjongo. <sup>32</sup>Ase inga okobalakani wango wakobalakani ino ewo edjnei la nda litomba atie ino? laate te wapangano wakobalaka wango wakobalaka pe iwo. <sup>33</sup>Ase inga wokokelakani olamula wango wokokelakani ino olamu oho e djei a nda litimba atie enu? te wapanganu pe wakokelaka ndji ndjongo. <sup>34</sup>Aleeti inga oko,bekisakani wango weewini ate wakowongwesele ino, eho edjei nda litomba atie enu? te wapangano p,e wakobekisaka odjangi oluki matabisi atie wapangano weti laate la mbuse watote enge wahekeleli. <sup>35</sup>Ase balani wanguna wanu wakelani olamu wabekisani odjengi oluki matabisi likiani odjui ma ema la mbuse; ase mbano wonu ekodja osungu wakodja wana la ongo weti likolo laate inde akokelelaka wato wango wati la ondimi pe wato wabe sambo dja oemeli. <sup>36</sup>Djaakani wato dja motema magba ndi nda sangbanu adjei moto o motema magba. <sup>37</sup>Aleeti deeni osambesi laate watiosambesani te keke deeni olumbesi wato la sambo laate watiolumbesani la sambo te keke. dukolelani wato ase wako dukolelani ino. <sup>38</sup>Hekelekeni, ase wato wakohekeleni ino wako swa la mabanga wonu wiwo ngbi enge epkotokoli, wadjadjesia etumia laate wakomekeleni ino la epimo enge wokomekeleni iwo. <sup>39</sup>Ndjongo ahekeleli iwo aleeti lisekpe mwesi: moto ngo ogwi maiso akokiti o inyei moto ngo ogwi maiso mboka. te ndjongo? iwo kpaa waale wakokwa la liwela. <sup>40</sup>Mano o kelasi a etiti motiesiakoli onde, ase moto kpaa ongo o inyami olamu olamu akodja nda motiesiakoli wonde. <sup>41</sup>Nda ndenge okoeneké okasi a maiso e mino owe, ase otieneké osoto enge edjei ndondo e maiso lowe? <sup>42</sup>Nda ndenge okoki ohaseli miino owe; dheé mbai ilongose osoto enge edjei ndondo e maiso lowe otieneké osoto enge edjei atie owe? moleho, longosewo osoto la maiso mo owe, ase okohene olamu ndenge ohumesi osoto enge edjei la maiso e miino owe. <sup>43</sup>Motee molamu etikpalaka pukapuka obe ndinda motee mobe eti kpalaka pukapuka elamu. <sup>44</sup>Laate mote la motee ekoyewanaka la pukapuka djande wahibukaka a motee lawa keke te. <sup>45</sup>Moto molamu akopumbesaka sambo dja olamu la olamu enge ehisi inde a motema monde ase moto mobe akopumbesaka sambo mbee la obe enge eyisi inde; laate monoko nonde ekohasaka ndji sambo enge etumi a motema. <sup>46</sup>Djongo atina ende okowelakani mbai nkolo! nkolo! ase otikelakani sambo enge mbai ikohasaka. <sup>47</sup>Moto kpaa ongo akodjaka atie mbai pe akoyokaka loi lo mbai ase akokelelaka eho ayengemeni la ndai? <sup>48</sup>Ayengemeni la moto ongo omaali monguta enge atongali liwela molindake pe ase abatali mikolo la mabukeli ndjongo ango pela edjali ewale

embingamingali monguta eho, ase etikwali esungu te laate emaanali olamu.<sup>49</sup> Aleeti motongo akoyokaka pe aikelelaka, aengemeni la moto ongo omaali monguta likolo la ngene ase atibatali olamu, ango edjeeli pela ebingamingali ewo ase la mbala kikima ekwali.

## 7

<sup>1</sup>Ango esesali Yesu wasi djinge sambo kpaa atie wato, ase akia la kapalanaume.<sup>2</sup>Ongo ndjongo likumu mwesi owa sodo adjaali la mituke monde ongo omobalakali inde ngbii, moto oho adjali la ekoni ahue e logo. <sup>3</sup>Ango okali inde mboli e Yesu, awatomali la weeti wiloko wato ewa Yuda wake o mokongi adje omokulesi motuke monde. <sup>4</sup>Waurnia atie Yesu, wamowongia ate: oho a wongi la omokeleli enge. <sup>5</sup>Inde abali moki mosu, inde moto otomaeli ehele Sinagoga. <sup>6</sup>ndjongo Yesu akia la iwo mongindji. Ango ewuma inde pene imolako monde, likumu ewa soda atomali wato la omowasele Yesu ate likumu otiatungese. Mbai edjei ndai laate olingela la molako mo mbai? <sup>7</sup>Nde la ndjongo etiya ene olamu adjii mbai amene odjii ati owe. Kasi asa saa loyi loyikima motuke mo mbai akokala. <sup>8</sup>Alikambo ate mbai idjei sese e makumu ma mbai, idjei la masadje sese e mbai. Inga iyasa la mwesi, keke ase akoke, enga lya sa alidji djaka! akadja, inga yasa la moto ombai iwotomi: kela ndjo! ase akokela ndindjongo. <sup>9</sup>Ango okali Yesu, djihinge sambo, am ondimoioholo moto yakukolia, awaselia wato selini tee ala la Isalayeli etimowene moto otimake iyowa wango wamotuti. <sup>10</sup>wato wango wawatomali likumu ewa soda kapiteni, wawongoya la monguta, wa mogbotia moto owotomu, ndi akaliga wolamu. <sup>11</sup>Mbuse eho Yesu akia la gbata e waine watutiani wande la wato ngbii wakia la inde mongindi. <sup>12</sup>Ango ewana inde la moduhe mo gbata, wato wakpali molonda okii la moho la kabali, e mana opele mwesi omoli ongo ogweli molome, wato wa djaali la moli oho mongi ndje. <sup>13</sup>Ango e mwenali likumu moli oho, amoyokelali magba la motema amawaseliaate: otilele. <sup>14</sup>mbuse eho Yesu akia ahue a bandia sanduki wato wango wagbalali molonda wamalia: Yesu asia: mana opele yasi la owe! amala likolo! <sup>15</sup>Moto mogwake alongoya, aabatia ase apotia okpomi. Yesu amohekelia la nango. <sup>16</sup>wato kpaa wawangia, wamo emelia mwengei, waasia: mwaseli mosungu aumiga atie su! wasia koto Mwengei aumiga owakalesi wato wande. <sup>17</sup>ndondo e Yudea kpaa wibeta wa keleele kpaa wato waokia mboli a lungo loi ekeli Yesu. <sup>18</sup>Watutiani wa Yoani mopatesi wa mwaselia sambo djinge. Yoani awelalia wato wale ndondo ewu. <sup>19</sup>Ase awatomia atie likumu la omohueli ate: odjei moto ongo wewi iso ate ageleli, inga tomolambeledi? <sup>20</sup>ango eumia iwo atie yesu, wa moaselia; Yoani mopatesi, atotomi iso ate tohuele: odjei motoongo wewi iso ate ageleli inga tomolambeledi? <sup>21</sup>la engele eho Yesu awakalesia wato ngbii wa wikoni, la wato wango waliti wenge wibe la awaduholia wato ngbii maiso. <sup>22</sup>mbuse eho awawongoselia watutiani wa Yoani, mopatesi: kekeni omwaseleni yoani mopatesi loi wungo woeni ino wungo woki ino: wato wagbi maiso wakoeneke, wato wabukakani makolo wacosombaka, wato wa ekoni e mbala wakooka, wato wadikami matoi wakokalaka wato waguaki wacosusuaka, wato wango wadjangi wa kokaka mboli ndamu. <sup>23</sup>mwemu la moto ongo obanei wondimi wonde! <sup>24</sup>ango okio watutiani wa Yoani, Yesu apotia wasi loi wo Yoani, atie wato ngbii asia, dengakininanda ema ongo la lisobe? mboli djinge ikoni nganesaka ehoho? <sup>25</sup>Ndjongo okadengakini nde? moto ongo okpali wisindje wilamu? ase wato wango wakpali wisindje wa motio moatasungu, la wato wa wadjenge ngbii wadjei la minguta ma makumu. <sup>26</sup>Ndjongo okadendakini nde? mwaselia? memena yoiwaselini, la wato kpa moto tueti atimoete Yoani. <sup>27</sup>Alika mbo ate Yoani adjei moto ongo eyasi e kpa ta e Mwengei la gbondo ende: mwengei aasia: denda imotomi motomani mo mbai liwoso la owe, alikambo la odukoli mboka alikambo la owe. <sup>28</sup>Yesu asia alidi: yasi la ino: ndondo e wato wango wawotami la moli tweti odjei mo sunguomoleki Yoani, ase moto ongo ongo odei mokeke oleki la moki e Mwengei adjei mosungu omoleki inde. <sup>29</sup>wato kpaa la wandombe wa oputesimamelo; wadjali omooki Yesu, waewali ate Mwengei adjali memene; ase wapatali watisimo e Yoani. <sup>30</sup>Ase wafalisayo la wa mwalimo wapui watonia mwano mo Mwengei alekambo lawu, ase watonia lipatesi la Yoani. <sup>31</sup>Yesu asia koto: ikowa kokanesa wato wa ehele engele lande? <sup>32</sup>Wadjei nda wana wango wabati la ebete e liho; wakowaselaka iwo ameme ate: tobinge lalini ino malinga ase otiwinalini te! toolembali elembo dja magba ase oti lelalini te! <sup>33</sup>Alikambo Yoani mopatesi adjali inde atilakali wokoke te, la atikengali ase woasa lini: adjali la molimo mobe. <sup>34</sup>Mbai man a o moto edjia ikolakaka la ikokengaka, ase woasiani: modendani oholo moto akomungwaka ndi olaki la okengi wino, inde aewani la wato wali. <sup>35</sup>Ase wato wa wondimi wakoeneke la wohola ate lokenge wo Mwengei wodjei memene. <sup>36</sup>Mofalisayo mwesiamowelia Yesu la olaki la monguta monde yesu aumia atie nde, ase aabatia la mesa. <sup>37</sup>Moli mobe mwesi adjali la moki moho, angae okali inde ate Yesu akolakaka la mongutha mo Mofalisayo akadjia la molangi mokelami alibanga la malasi. <sup>38</sup>Aamali mbuse, la makolo na Yesu. Adjaali oleli, adjaali oluleyi makolo ma yeni la poo, la ohuholi la sue djande, ambo mbia moho alidji omonolali malasi. <sup>39</sup>Ango woenia ohongo mafalizayo omowelali Yesu luhungo loi asia la motema monde inde oholo motoadjaaki memene mwaseli nda amwewi ohongomoli okomobandaka ate adjei moli mobe. <sup>40</sup>Yesu apotia wasi la Mofalisayo simo, edjei la ma loi wokele la owaseli, Simo asia mwalimo; asa. <sup>41</sup>Yesu asia: wato wale wadjali la nongo e moto ongo okahaka nongo mwesi adjalila nongo e wadjenge tuku itano. <sup>42</sup>Nda ndenge idjangali iwo falanga efutake. Ongo moto awalimbisia iwo wale ndai okomobala ohongao moto oleki? <sup>43</sup>Simona awongosia: imungoli ongo odjei la nongo sungu oleki. Yesu amwaselia owongosiga wolamu. <sup>44</sup>Mbuse eho Yesu akukolia atie moli ase asia la Simo omweni oholomoli? mbai ilingeli la monguta mo owe, ase otihekele mbai malia ma wakpoli la makolo ma mbai te, ase oholo moli akpoliga mbai makolo la malia ma maiso mande, ase akuholiga la sue ndjande. <sup>45</sup>Otihekele mbai mobale la wasasi tee ndinda elengeli mbai la monguta inde adeiti opotopoti, makolo lo mbai la ombombi. <sup>46</sup>Otisuele mbai maita lamoto ase inde asuiga malasi la makolo ma mbai. <sup>47</sup>La ngo iwaseli libalano lisungu lienesi inde, enesi ate masumu mande ngbii malimbisami kasi ongo wakomolimbisa maakeke abali keke. <sup>48</sup>Asembuse Yesu

asia la moli oho: masumu ma owe malimbisamia. <sup>49</sup>Wato wandjaki olaki la Yesu mongindinwasia la mitema mawu: oholo moto adjei ndai? ongo wongi olimbesi masumu? <sup>50</sup>Ase Yesu amwaselia moli: wondisi wowe wookalesi owe.

## 8

<sup>1</sup>Mbuse eho Yesu akeeli gbata la gbata, ase mokii moosaa la mokii moosaa. atie sakolia alidji awa sumbelia mboli ndambu ookumu e Mwengei wakomotutiaka. <sup>2</sup>La ndambo e wali wango kalali la milimo mibe la wikoni; maliya edjali iwo omoweli magadala ongo omopumbesali witita sambo. <sup>3</sup>La Yoani, moli o kuza kapita o Elode la Suzana la weti wali wango wadjali ohekeli wihoo djau a tina owasalesi iwo. <sup>4</sup>Sikalandjo ango ebiba e wato wayaboleali ebete kikima la wato wadjaali odi a mokii la mokii wakodja atie inde. awahaselali iwo la lisepeke liesi: <sup>5</sup>Mohoni mwesi apumbali oki ohoni mboto ende pe ango edjaali inde ohoni pukapuka eheti ekwali pembeni e mboka wakpotokolali eho, pe mbulu e likolo walakali eho. <sup>6</sup>Ndambo eeti ekwali likolo la libukeli pe mbuse opumbi ekaukali laate etidjaali la malia te. <sup>7</sup>Ndambo eeti ekwali ndondo e keke, ase keke enge ebekali la eho ebete kikima ewolali eho ani. <sup>8</sup>Ndamboeeti ekwali a mbume enge elamu, ase mbuse ebekali e wotali, puka puka mbo kama la mokama. Ango esiselali ide owasi, aasia alidji la mooli mo pamake: ongo odjei la matoyi maake. <sup>9</sup>Ase watutiani wande wabamdali omoweli ndimbola la enge lisekpe. <sup>10</sup>Inde ahasali ate: ino okoki la oyewi wihisaneli mosantu e likumu Mwengei, ase ikohasaka la weti ndi la wingbundu laate te wakodendaka, watiyeneke, te ndenge ekoyoka iwo watihole tinate. <sup>11</sup>Sikalandjo ndimbola e ndakisa enge eholele: mboto edjei liloba e Mwengei. <sup>12</sup>Enge ekowali pembeni e mboka edjei wato wango wayoki, la mbuse etota edia alongosia liloba a mitema mawu laate watindime pe watikale. <sup>13</sup>Enge ekwali likolo e libukeli edjei wato wango inga wayokia liloba, wayambia eho la ohemeli, ase wati la mindili te; wandimia tango keke, ase atango amekamia iwo wadeiya ondimi. <sup>14</sup>Enge ekwali likolo la keke ehonde wato wango wayoki, ase nda sambo e mabundo, la ohemeli sambo dja moki, puka puka djahu eti komelali. <sup>15</sup>Enge ekwali likolo la mbume e olamu edjei wato wango mbuse e oyoki liloba la motema molamu, wat tike onde wawu, wa wotia mbuma. <sup>16</sup>Moto te mwesi mbuse ololesi mwinda, monde adhihe obati sese epee, ase okobataka eho ndi la katini alidji watibaka sese epee, wakobandaka likolo la mesa alikambo inga motoalingela a molako ayene. <sup>17</sup>Laate djinge sambo eyisami ekoyewana alidji sambo djinge etiye wane ekopumba a hoho. <sup>18</sup>Eho enge kebani la ndenge okoyokakami, laate moto ongo odjei, la iwo ngbi, wokomohekele ngbii, ase moto ongo ati la ema te, mopuesa te enge keke enge ebateli inde motema. <sup>19</sup>Sikalandjo nango la wa ma nango wadjali atie inde ase ogbotoni, la inde latina ewato wadjali ngbi. <sup>20</sup>Ndjongo wamohaselali inde ate: ngwa la wa mangwa wahamali ongo saa, wabali ate wa ohene. <sup>21</sup>Inde awawongweselia ate: ima ombai a wa manima wa mbai edjei wango wakoyokaka liloba e Mwengei pe wakobalaka eho. <sup>22</sup>A lisio liesi, Yesu iwo la watutiani wande walingelali a masuwa, ase ahasali la iwo ate: tokpande a ngambo eti e malia ndjongo wakeeli. <sup>23</sup>Tango edjali iwo oki, Yesu adjali olangali ilo. Ehoho ekelali ngbii, pe malia ebandali olingeli a masuwa pe wadjali pene e olindji. <sup>24</sup>Mbuse wayekoli, wakeli ebete elangalaki inde pe wamosusolia wahasia; motiesi, topoti ogwi! ango esusoiya inde apamelia ehoho malia ebandali owadjimbi, ali ase logo elingelia. <sup>25</sup>Ndjongo awahaselia ate: eni ondimi wonu? ase wawangali ngbii, wakamwali mingi, wahasia: oholo adjei mpedja ndai? laate adjei ohekeli te la ehoho pe malia wingbundu e eho ekomoyokaka? <sup>26</sup>Waadjimbi la moki mo Wagesenia, mungo modendani la Galilaya. <sup>27</sup>Ase ango Yesu aandjimbia la mbume, motopele mwesi o mungo moki, adjali la milimo ebele. eumoya masio atokpalaka esindje te atidjaali owabati la molako ndji la kabuli. <sup>28</sup>Amoenya Yesu, apamia akuya la makolo mande, aasia la moli mosungu: iso la owe todjei loi, Yesu mana o Mwengei olikolo? yaleli la owe, otiudjeenese mbai wodidi. <sup>29</sup>Ase Yesu asia la enge esisi eume atie moto oho. Alikambo ewumuyi gaala ekomokweseke masio kpaa wani obaniakali, la omonangi seni la wibende la makolo, kasi adjakali otenakoli wiho kpaa wimonangakali iwo. ase adjali otomalali la djinge witota owabati la manganga. <sup>30</sup>Yesu amohuelia: nkombo owe ndai? amowongoselali: ngbii laate wadjali ngbi la wenge wande. <sup>31</sup>Ase wamongokoli Yesu atiwalumbe la liwele lilindake. <sup>32</sup>Edjakali ango, la mokoli, lihoke lisungu la walu. Ase wisisi Yesu ate walingele la liwoke laho, awandimelia. <sup>33</sup>Wisisi wipumbia atie motooho, wilingelia la liwoke la ngulu, owa longwali emokli, eyasuali la ligbutu iwogbali waguai. <sup>34</sup>Ango eyenia wato wango wadjali obanei djege ngolu, watilia obangu akasumboli la gbata la miki mikeke. <sup>35</sup>Wato wakia okeni nda ekelani sambo djaho, wakia ahue djei Yesu ase wamogbotia ongo moto omoumali milimo aabati la makolo mande akpali esindje eklamu, lomungo wonde woumia wolamu ndjongo ewawangesia makasi. <sup>36</sup>Wango waeneli nda oleki sambo djaho wawaselia wato nda ekali moto o milimo mbe. <sup>37</sup>Wato kpaa wa moki Gerasa wasia la Yesu ate alongwe ahue la iwo, alikambo ewawangesali makasi Yesu atilia la wato awongoya. <sup>38</sup>Ongo moto omoumali milimo mbe amwongia wabate iwo la inde kasi Yesu aumbia la inde aasia ate: <sup>39</sup>Wongwa la ndako ase akowasela ndjinge kpaa eyokeleli Mwengei. Akia adjawaselia la gbata ndjinge sambo kpaa imokeleli Yesu. <sup>40</sup>Ango ewongoya Yesu, wato ngbii wamoemelia, alikambo iwo kpaa wandjakali omolambeli. <sup>41</sup>Ase denda amoemia moto mwesi nkombo ende yalusi ongo odjei likumu la Sinagoga. Akuya la makolo mande, ase aasia lainde ate alingele la ndako eende. <sup>42</sup>Alikambo ate andjali la mana omoli ombula liomi la iwale anguali, ango okia Yesu wato wabandali omopotipoti. <sup>43</sup>Ndiango, moli mwesi andjali la ekoni ewoumi makila mbuse ewilanga liomu la wiale, ongo osilali wambele wande kpaa aatie e minganga, tee ango moto tweti te amokaleli. <sup>44</sup>Aandongbia mbuse eende ase ahelia esindje e Yesu ndila engele eho makila madeya omoumi. <sup>45</sup>Ase Ysu aasia ate: moto mwesi aheli mbai? wato kpaa wawungania, Petelo la wato wango wandjakali ango waasia ate: likumu, ebele ewato watumi a la gboo ase walengi la owe, ase woasia ate: Ndai oheli mbai? <sup>46</sup>Kasi Yesu awongosia ate: Moto mwesi aheli mbai alikambo yewi ate wokulu wondjumi mbai. <sup>47</sup>Ongo moli, aeniate loi wungo wouminga saa, akia andja kpmakpame akuya la makolo mande, aasia liwoso la wato kpaa nda emoheli inde nda ndenge ekali inde la mbala kikima. <sup>48</sup>Yesu amwaselia: Mana o mbai omoli wondi wo owe wokalesi, keke logoo. <sup>49</sup>Ango edjakali inde owasi moto

mwesi alongoyi la molako mo likumu mo sinagogi asia ate: Mano owe omoli agwi, atimwaselake likumu.<sup>50</sup> Kasi Yesu, aokya ndjoongo amwaselia likumu la Sinagoga: otiwangete ndimela mana akokala.<sup>51</sup> Ango eumia inde la moguta atekesia ate moto twèti atilingele la inde mongindi, elingle ndi petelo, la Yoani ase la yakobi, ase la sango la nango ongo mana.<sup>52</sup> Wato kpàa walelia waokia magba masungu: ase Yesu aasia ate: deeni oleli, agwiti, kasi alali wilo.<sup>53</sup> Ase wamosekia, waasia ndi ate agui.<sup>54</sup> Kasi amohelia la mawo; aasia la moli mopambake: Mana, amala.<sup>55</sup> Ase elimo ende emowongoya, ndiango aamalia; ase Yesu awaseli ate wamohewilaka alake.<sup>56</sup> Wawoti wa ongo mana omoli waahuelia, awaselia ate watimwaselake moto te weti sambo ndjinge.

## 9

<sup>1</sup>Yesu awawelia wango liomu la wale, awahekelia wokulu la makoki likolo la ndiwa, la makoki ma okalesi wikoni.  
<sup>2</sup>Awatomia osakoli wokumu wo Mwengéi, la owakalesi wato wa wikoni.<sup>3</sup>Otiikakeni ema teeti angokia ino, awaaselia ate, esuki emote, te wapasa te wokoke, te waambebe woidjakeni la wisindjè wasele wiale.<sup>4</sup>Minguta kpàa mikolingela ino abatani anga, angonde eobalini iwo.<sup>5</sup>Ase inga wato watiwoemeleni, umani la enge gbata, ase huholani motuluemo makolo manu, ehoemesi wobe wou.<sup>6</sup>Wakia ase waumia moki la moki, osakoli mboli ndamu, la okalesi wato.<sup>7</sup>Herode modengeli aokia sambo ndjinge yasanali la ndjinge ilkali, ase mamungwene mamosilia. Alikambo ate wato wadi wakoasaka ate Yoane ongo asusoi gaala logo.<sup>8</sup>Wato wadi, waasia ate Elia ongo olimwali, ase wadi waasia ate mwesi o waaseli ongo osusoi gaa.<sup>9</sup>Kasi Herode asali ate, mbai imotenali Yoane moto; ndai kasi ongo, enge ekokaka mbai ndjinge sambo? ase amolukia ate omoene.<sup>10</sup>Waapositolu, wakawongoya, wa mwaselia Yesu sambo kpàa ndjinge ikeli iwo. Awatotia lainde mongindi, wakia ebete esi aati e gbata esi enge ewelani ate Betesaida.<sup>11</sup>Ebele ewato waewia, wamotuteya. Yesu awaemelia, ase awaselia likambo la wokumu wo Mwengéi; awakalesia wango wandjakali la mposa eokali.<sup>12</sup>Ango abandia wuse otitimi, wango liomu la wale waandogbia ahue la inde wa mwaselia ate wawongosa wato, la ate wake la miki la wibete winge windjéi ahue, wakonde ebete elangalake la ndenge eokali; la ate iso tondjéi ala la lisobe.<sup>13</sup>Yesu awaaselia ate ino wahekeleni wilaka. Ase wamowongoselia ate: Eondjéi sa la makoke matano la su iwale la qte toke iso mene toke okasombi wilaka wa wato kpàa.<sup>14</sup>Kaiko nde wato wandjaali koto itano, Yesu awaselia watutiani wande ate waaselani waabate la mbume wato la wato melengo mwèsi wato suku itano.<sup>15</sup>Wakelia ndindjongo, wawaaselia iwo kpàa waabate la mbume.  
<sup>16</sup>Yesu atotia mango makoke matano la ndinge su iwale, ase alongosia maiso dendia likolo, amapamboya. mbuse abukkolia, awahekelia watutiani wawakawele wato.<sup>17</sup>Iwo kpàa walakia wagbetia ase waonia wisuki winge witikali, mindjangi liome la miale.<sup>18</sup>Wuse wesi Yesu aakongokoli saa inde mene, andjakali la watutiani wande, awahuelia ate ebete e wato wakwasaka ate mbai indjéi ndai?<sup>19</sup>Wamowongoselia ate: Yoane mobatesi; wadi ate, Elia, mwèsi owaaseli wa gala osusoyi.<sup>20</sup>Awahuelia, ino okwasa kani ate mbai indjéi ndai? Petelo awangoselia ate: Kilisito o Mwengei.<sup>21</sup>Yesu awatekesia makasi ate watimwaselake moto twèti.<sup>22</sup>Aasia alidi ate ewongi wolamu ate Mana omoto aene wodidi ngbii, wato wagala wakomolumba mla wadingeli la wakawi la wato wabe, wakomoola, ase akosusua wuse wo misato.<sup>23</sup>Mbuse eho awaselia iwo kpàa inga moto abali ate atutie mbai, aatone inde mene, akpale mosalaba monde masio kpàa, ase atutie mbai.<sup>24</sup>La ate ongo obali okalesi wenge wande akowungesa, kasi ongo okowungesa wenge wande la likambo la mbai ako kala.<sup>25</sup>Ase nda ema ekokondja moto inga andjwa moki mwèsi kpàa, kasi awungesa wokongi wonde.<sup>26</sup>Alikambo ate ongo okooka nsoni la likambo la mbi la sambo nda mbai, Mana omoto akomookela nsoni, angokondja inde la wongengi wonde, la wungo wo Wawa la waahumbwa wasatu.<sup>27</sup>Iwoasellini memene, wato wadi wango wandjéi ala watoguate ndi waene wokumu wo Mwengei.<sup>28</sup>Elekia msio mwambi mbuse ewasi ndjinge sambo, Yesu awatortia lainde Petelo, Yoani la Yakobo, ase atelia la mokoli la okaakongi.<sup>29</sup>Ango wakongokoli inde, elongi ende ekukwania, wisindjè wande wiumia pèe oleki.<sup>30</sup>Ase denda, wato wale wakokpomesanaka la inde: endjakali Moise la Elia,<sup>31</sup>Wango weueneli la wongengi ase wapotia woasi woki wonde wokelame la Yelusalem.<sup>32</sup>Petelo la wino wande wandjakali la wilo; kasi, angokosusoya iwo, waenia wongengi wo Yesu la watpo wale wandjéi la inde mongindi.<sup>33</sup>Ango edenia inde la wango wato wale la Yesu, Petelo amoaselia ate: Likumu, endjéi wolamu toabate ahala; tokele minguta misato, mwèsi mo owe, mwèsi mo Moise, mwèsi mo Elia. Atiewakali enge ema la sakali inde.<sup>34</sup>Ango andjakali inde woasi, lipata liesi; ase lipata liesi liwadihia; ase watutiani wa wangia wamwenia akolingela la mapata.<sup>35</sup>Ase mooli mwèsi mwasia la mapata, mwasia ate: oholo andjéi Mna ombai omwoni mbai mookani.<sup>36</sup>Ango ookania mungo mooli ndjoongo, Yesu atikalila inde moikima. watutiani wadakia longoo, ase te omwaseli moto, la enge engele la sambo ndjinge yeneli iwo.<sup>37</sup>Wuse wodi wolekia, angokondja wanjimbakali iwo la mokoli, liwoke la wato ebele wakanja liwosa la Yesu.<sup>38</sup>Ase denda, awondja wo wato moto mwèsi apamia: Likumu, iwongi, modenda mana ombai opele, andjéi mana ombai moikima opele. Esisi emohelia, ndiango ahumbia pui.<sup>39</sup>Ase esisi emohelia makasi eomokwèse emoumesa mahulo la monoko, ekomokelaka makasi, mbuse ende okwakwi la mbume.<sup>40</sup>Iwaongia watutiani wa owe waumbe la eho, ase iwo te okoki.<sup>41</sup>Liwota lindjangi wondimi la liyaimbi, ewawongoselia Yesu, ikoumwa l ino tee nda eengele, la ikonanga ino motema la sambo ndjanu ndjaka la mana wo we.<sup>42</sup>Ango eumia inde ahue, esisi emolumbia la mbume, emohelia makasi. Kasi Yesu aumbia la esisi ebe, amokalesia mana ase mowongosia atie sango.<sup>43</sup>Ase iwpo kpàa waahuelia la wosungu wo Mwengéi. Kaiko nde mwèsi la mwèsi wandjakali waahueli la sambo kpàa ndjinge ikelakali Yesu, asia la watutiani wande: <sup>44</sup>La ino okani wolamu luhulo loi: Mana omoto awongi wamokawe la mawo ma wato.<sup>45</sup>Kasi watutiani watiokali lungu loi, loi loho woyaisali, ate watioke gbondo eho ase wawangia omohueli gbondo eho.<sup>46</sup>Kaiko nde mamugwene ma wadjelia la elimo, la wewi inga ndai odjéi moto mosungu la kati eewu.<sup>47</sup>Yesu, aenia mamunwene mau la ndondo e motema amootia mana mokeke, amobatia ahue wande.<sup>48</sup>Ase awaselia ate: ongo moto okomoemele mana mokeke oholo la nkombo embai, aeeli mbai amoeli ongo atomali

mbai. Inga moto adja mokeke liwoso la nu kpàa, inde ondjéi mosungu.<sup>49</sup> Yoani aotia loi ase asia telikumu, iso to mwèni moto mwèsi akoumba la wisisi la nkomboeowe; ase iso to motekesia, alikambo ate atotuteiti iso.<sup>50</sup> Otimotekeseni, Yesu awawongoselia; alikambo ate moto ongo oti motone monu adjéi atienú.<sup>51</sup> Ango eumia eho engele ende olongoi la mokili eumia ahue, Yesu aotia mamungwene ma okii la Yerusalemé.<sup>52</sup> Awatomia liwoso lande wasumbi mboli, wakia la mboka ase walingelia la ebete esi ewasamalia, alikambo lka omowongeleli ebete eabatake.<sup>53</sup> Kasi waeniti te, alikambo ate aanali okii la Yelusaleme.<sup>54</sup> Watutiani, Yakobo la Yoani, waenia ndjoongo wasia ate: Likumu obali ate toonge misa minde ongo likolo miwalongose?<sup>55</sup> Yesu aakukolia aatie wu, aenia ndjoongo, asia ate, awatekesia, aasia ate: wewitini enge ema akwasakani ino.<sup>56</sup> Inga mana omoto andji te la owungesi milimo ma wato, kasi la owakalesi. Ase wakia atie edi.<sup>57</sup> Ango ondakali iwo la mboka; moto mwèsi amwaselia ate: Likumu, ikotutia wiati kpàa wiko ke owe.<sup>58</sup> Yesu amowongoselia ate: masika mandjéi la wibete wilangalake, mbulu ndja likolo indjéi l wilako: kasi Mana omoto ati la ebete eabatake moto.<sup>59</sup> Aasia la odi: Eutia mbai. Ase awongosia ate: Likumu dee yo mbai ike okamokundi wawa.<sup>60</sup> Kasi Yesu aasia la inde ate: dee wato wagwake wakundane iwo mene ase owe, keke kaase loi lo wokumu wo Mwengei.<sup>61</sup> Odi aasiate: Ikotutia, Likumu, dee yo mbai ikawasela wato wa monguta mo mbai.<sup>62</sup> Yesu amowongoselia ate: kpàa ongo obati gaa wiho wande wibukelaki la seleti, la odendi mbuse, ati wolamu la wokumu wo

## 10

<sup>1</sup>Mbuse eho, Likumu aonia watutiani tuku sambo awa tomia wale wale la miki misungu mpe ibete kpàa ibete winge ibalakali nde oki.<sup>2</sup> Awaselia: elanga edjéi esungu kasi watuke wadjéi wakeke. Akongani la memene elanga laate atome watuke la obuki.<sup>3</sup> Kekení. Dhenga, iyotomini nda wana wa kondolo ndondo e pange.<sup>4</sup> Otikpaleni ema te e kikima, te wuka te wikipokpo, otihekelekeni moto ewo la mboka.<sup>5</sup> A minguta minge mikolingela ino asayoni liwoso: otwa e Mwenei odje la mu monguta.<sup>6</sup> Inga edja la moto mwesi ologoo, logoo enu ekoyabata likolo lande, inga te ndjongo okowongwa etie nu.<sup>7</sup> Abatani la mungo monguta, lakani pe kengani iho kpàa ekohohekeleni iwo late motuke awongi la liputa. otikeni monguta la monguta.<sup>8</sup> La miki misungu minge mikolingela ino, la kanio ilaka kpàa winge ikohekeleni ino.<sup>9</sup> Kalesani wato wa ikoni wango wakogboto ino pe waaselani ate okumu wo Mwengéi wo umi la hue.<sup>10</sup> Kasi la miki minge mikolingelani ino alidji mitiooyambani ino amalani la mboka pe asani ate.<sup>11</sup> Tohuholani la limemu te motubu e gbata enu enge ehelanaki la matindji masu; ase yewani ate okumu wo Mwengei e wumiga ahue.<sup>12</sup> Iyowaselini ate enge lisio, Sodome akweene odjidji maa keeke kasi enge moki ekweetela.<sup>13</sup> Magba la owe, Kolazina! magba laowe, Betesada laate inga sambo dja kamwake makelamali atie ino, ekelamali ongo la Tile, la Sidonia, ekokiti oeti masio ngbi late wakukule mitema mau pe wakpale saki mpe wayabate la miwutu.<sup>14</sup> Tile la Sidonia wa tidja la loi la use wungo osambesamake nda ino.<sup>15</sup> Kasi owe Kapalanauma, eyadjambi owe tee likolo la mapata, okoyadjimba sésé tee la ehomeli e logo.<sup>16</sup> Ongó akookani ino, andjoki mbai, ongo akootonani, atoni mbai, mpe amotoni ongo otomi mbai.<sup>17</sup> Wango wato tuku sambo wawongwali la mwemu wa mwaselia ate: Likumu, te mindjili, la isisi itotosi la tina e kombo e owe.<sup>18</sup> Yesu awawongoselia ate: imweni esisi olongwi likolo tee okpi la mbume nda libuga.<sup>19</sup> Dhenda mbai iyohekeleni okumu ate osombeni likolo la ndjo, likolo la gake, pe otetelake likolo la moto kpàa ongo okokelaka likala la mbai, pe ema te ekikima etiokelani.<sup>20</sup> Otiemeleni angó e otosini isisi, emele ate inga kombo e owe edhingami ongo likolo.<sup>21</sup> La enge engele Yesu atumisamali la mwemu e molimo satu, asia ate: iyodemei owe wawa, laate owe nde okelali likolo la mbume, laate oyisi dji sambo atie wato walomungo, pe wakandela, kasi oenisi sambo djao atie wana wakeke, iyemeli la ndenge ekeli owe ndjongo.<sup>22</sup> Iho kpàa wawa nde opekeleli mbai, moto toeti ayewi ndai adjei mana, inga etidje wawa, te ndai odjei wawa, inga etidje mana, alidji la ongo mana amoyinei.<sup>23</sup> Ayakukolia atie watutiani wande awaselia iwo amene ate: mwemu la maiso mango meeni sambo djinge iyeni ino.<sup>24</sup> Iyowaselini ate, wasakoli ngbi la makumu walukali oeni dji sambo eeni ino, kasi waeniti, alidji ooki enge ekookakani ino, kasi watioke.<sup>25</sup> Mwalimo o mibeko ma Moise aamalia, aasia la Yesu, la omomeki: Likumu ikele woni laate itote mokalo mo libela?<sup>26</sup> Yesu amwaaselia ate: edhingani woni la mobeko mo Moize? Eni e tangi owe?<sup>27</sup> Amowongoselia: okomobala Likumu, Mwengéi e owe la motema mo owe kpa, la molimo mo owe kpa, la otetelake e owe, la omungo o owe, alidji mobala miino owe nda owe amene.<sup>28</sup> Yesu amwaselia, oasi olamu; kela ndjongo, okokala.<sup>29</sup> Kasi inde, abalia nda ate ayagalele, asia la Yesu: ndai odjéi miino o mbai?<sup>30</sup> Yesu awongwanelia oasi, aasia: Moto mwesi a longwali la Yelusalema la oki la Eliko. Akpia la mawo ma wato wabe, wamopuesia ihoo kpàa, wa mobingia ibhotu, wakia, wamodheyia pene e logo.<sup>31</sup> Nganga Mwengei mwesi nda nano aetali ndji enge mboka, amwenia ongo moto, amolumbelia ehói, amobabia.<sup>32</sup> Molevi mwesi, awumia enge ebete, amwenia, amobabia.<sup>33</sup> Kasi Mosamalia mwesi odjakali la okendo, awumia angó, atumali la magba angó emwenia inde ongo moto olangali la mboka.<sup>34</sup> Amototia amokpolia pota amomunolia maita la maana, amobatia likolo la punda ende, akamotikia la lopitalo laate wamosalese, abongia ewo la wuka wonde aumesia Falanga yale amohekeli memene lopitalo, asiaa lainde ate.<sup>35</sup> Mosalesa oholo moto djinge Falanga ikohungesa owe angó ekowongwa mbai ikoowongosela.<sup>36</sup> Ndondo e wango wato wasato ndai pendja odjéi minoongo moto akwali la mawo ma wato wabe?<sup>37</sup> Motiesakoli o mibeko awongosia: Ongó omoikelali magba. Yesu amwaselia: keke owe mpe kela ndjongo.<sup>38</sup> Angó edjali osombi Yesu la watutiani wande la mboka, walingelia la moki mwesi ndjo mpe moli mwesi oyewani la kombo e Malata awa yambia la monguta monde.<sup>39</sup> Inde adjakali la manango koto o moli omowelakali iwo Malia, ayaabatakali la makolo ma Yesu ooki mateya mande.<sup>40</sup> Malata ahelanali la tomo ngbi e monguta. Akadjia asia la Yesu ate: enge edjei olamu Malia ayabati angó sa pamba te ogamesi mbai? Mwasela agamese mbai.<sup>41</sup> Yesu amowongoselia ate: Malata, Malata okoyatungesaka alidji okowabingakolaka la sambo ngbii.<sup>42</sup> Kasi Malia aoni emesi emotiyo enge eti mopuesama.

<sup>1</sup>Yesu andjakali wakongi la ebete esi ndjoongo. Ango aseselia inde, mwèsi owatutiani wande amwaselia ate: Likumu, topundesali iso waakongi, nda ewapundesali ndjooni watutiani wande. <sup>2</sup>Awaselina ate: Inga wakongoni, asani ndjo: wawa nkombo eowe ekumesane; wokumu wo owe wodjee. Ha iso wokoke masio kpaa. <sup>4</sup>Tolimbese masumu masu nda ekowalimbese iso wino wasu; ase otitodhe la womekami. <sup>5</sup>Awaselina alidji ate: inga mwèsi onu adja la mino onde, ase akamogbotia a likolo amwaselia ate: Manima, bekese mbai makoke masato. <sup>6</sup>Alikambo ate manima mwesi adji atie mbai, iti la ema emohake. <sup>7</sup>Aseko, la ndondo e monguta, manango awongoselia ate: otilembese mbai idhihi gaa moluhe, la wana wa mbai tolangaliga, ikokiti olongoi laate iyohekele makoke. <sup>8</sup>Iyowaaselini, ingatate akokiti olongoi la omohi la loyi adjei maanango, akolongwa la loyi ate amotungesiga, akomoha djinge kpa idjei inde la eho posa. <sup>9</sup>Ase mbai, iyowaaselini: ongo, wakooaha; luka, okotota; binga moluhe, wakoodhukola. <sup>10</sup>Ongo okoongo wakomoha, ongo okoluka akotota, wakomodhuhuela ongo okobhingaka modhuhe. <sup>11</sup>Nda ndondo enu sango akomoha mana onde libukeli, inga mana amoongo okoke? te inga amoongo su, amohe ndjo te ate amohe su? <sup>12</sup>Ate inga aongo likei, inde amohe gake? <sup>13</sup>Inga ino wato wabe, nda edjei ino, oyewini ohi wana wanu wiho wilamu, edjei olamu ndjongo wawa o likolo akohekele elimo satu la wango wakomoongoko. <sup>14</sup>Yesu aumbia la etota enge etokpomaka. Ango opumbia enge etota, moto oho abandjia okpomi, ase wato ngbi wamondjimali. <sup>15</sup>Weeti waasia: akowumbaka la witota la kombo e Bezebule likumu e witota. <sup>16</sup>Ase wadji wato, la loyi e omomekake, wamoongia elembo enge ekodja likolo. <sup>17</sup>Nda eyewali Yesu mamungwène ma wu, awaselina ate: wokumu kpaa wokawani eho amene, wobhitani, ase monguta mokubhukia likolo laeti monguta. <sup>18</sup>Inga Etoto akawana ndondo eende amene, wokumu wonde wokoamala nda ndenge, alikambo ate ino woasini ate mbai ikoumbaka la Etota la okulu e Bezebule? <sup>19</sup>Ase inga mbai, ikoumbaka la itota la okulu e Bezebule, wana wanu, la kombo endai ekowumbaka iwo la witota? Edjei ndjongo wakodja iwo amene wadjodji wanu. <sup>20</sup>Kasi inga edjei ate ikowumesaka witota la mosei mo Mwengéi, okumu wo Mwengéi wodji etie ino. <sup>21</sup>Kasi inga moto owokulu adja la wisaneli, akodhendaka monguta monde, ema teeti etobitana. <sup>22</sup>Kasi inga moto ongo omoleki la okulu akadjia asane la inde, akomopwèsa wisaneli kpaa winge wibatelaki inde motema, ase akokawakola kpaa wiho winge wipuesi inde. <sup>23</sup>Moto ongo oti atie mbai adjei motone mo mbai, ase ongo owanesaniti la mbai, akawani la mbai. <sup>24</sup>Ango elimo mbe epumba la wenge e moto, ekoke la wiholo wiomake, la oluki ohomi. Ango etiene inde, akwasa: ikowongwa la monguta mo mbai ongo opumbali mbai. <sup>25</sup>Ase inga auma ongo akogboto ebete ekpasani wolamu mpendja. <sup>26</sup>Ase akoke, ase akatoti wilimo sambo winge widjei la otetelake omoyeti, wilingelia la monguta, wiyabatia, moto oho akoumia obe oeti nda ndenge edjakali inde liwoso. <sup>27</sup>Ango edjakali Yesu oasi ndjongo, moli mwèsi adhumbeya ndondo e wato ngbi, aasia: mogano la solo enge eogbalate la maweles maonungesali! <sup>28</sup>Yesu awongosia: Mogano la wato wango wakokaka loyi lo Mwengéi, alidji wakoisaka. <sup>29</sup>Nda eyakokyaali wato ngbi, apotali oasi: waawato wa keke wadjei moonga; wakoongoko ikamwa; etiwahekelama eeti ikamwa ndji enge e Yona. <sup>30</sup>Ndenge kikima nda Yona adjali elembo e wato wa Ninive, ekodja ndjongo la mana o moto la wa wato. <sup>31</sup>Likumu o moli o Midji akoyamala, la lingo lisio e esambake, la wato wa maa masiyo, akowahelesa, la loyi adjali gboo e mbume la ooki kandela e Salomo, ndhenda edjei ala la ongo o moeti Salomo. <sup>32</sup>Wato wa Ninive wakoyamala, linge lisiyo lisambake, la wato wa ehele engele, wakowahelesa, la loyi ate wayakukolali la mateya ma Yona, mpe denda, adjei ala oyeti te Yona. <sup>33</sup>Moto tweti akokiti olole lotambe abate la ebete eyisani te la seese e eboka, kasi okobata nde la ebete e likolo, la ate wango wakolingela weene hoho ngbai. <sup>34</sup>Liso la owe edjei lotambe la wenge wowe. Inga liso la owe edja olamu, aseko wenge wowe kpaa ekodja ngbai, kasi inga liso la owe libitana, wenge wa owe ekodja la la likolo. <sup>35</sup>Djaa la oyabane late hoho linge lidjei wowe etiume likolo. <sup>36</sup>Inga wenge wowe kpaa edjei ngbai, esuki teeti etidjaa la molili, ekodjaa masio kpaa la hoho, nda engele enge ekweneseke lotambe mbai. <sup>37</sup>Ango edjakali Yesu oasi, mofalizayo mwesi amowelia ake olaki atie inde. Yesu alingelia ayabatia la mesa. <sup>38</sup>Mofazayo aenia la oyahueli la ndenge enge eyakpoliti inde mawo liwoso la olaki wilaka. <sup>39</sup>Kasi Likumu amwaselia: ino, Wafalizayo, okoyagbolokoni saa ekopo la e sani, kasi ndondo etumi la sambo mbe la omemelake. <sup>40</sup>Wato wadjangi sambo ndamu! Ongo okeli saa atikele pe ndondo? <sup>41</sup>Kawa yo enge edjei owe la eho ndondo, kpaa ekowumela langaa. <sup>42</sup>Kasi magba la ino, Wafalizayo! aloyi ate okohaka mwesi la liomu e makabo ma mite milamu, la itutaki kpaa, mpe la djete songosongo kpaa, kasi okwetakani lihele e omeemene la libalano e Mwengei. Okokakini okeli dji sambo, pe otiwosaneni djinge sambo djete. <sup>43</sup>Magba la ino, wafalizayo! la loyi ate obalini oyabati wiholo wa poo la sinagoga, la ototi mibale la witutaki. <sup>44</sup>Magba la ino watiesakoli wa mibeko la Wafalizayo: la loyi ate odjeini nda mbila djinge etieneneke, enge wato wakosombaka likolo laho pe watiyewaka eho. <sup>45</sup>Mwesi ewatiesakoli wa mibeko atotia luundo, amwaaaseli ate: mwalimo, nda easi owe ndjongo, idjei iso pe okototangakolaka. <sup>46</sup>Yesu awongosia: magba la ino mpe, watiesakoli wa mibeko! a loyi ate okokpalisakani wato mikpali ma minga migbalake, enge etibandaka ino amene te la mosei moikima. <sup>47</sup>Magba la ino! la loyi ate okomakani mbila ewa sakoli, wango ewaolali wasanganu. <sup>48</sup>Oinyeini sambo e watata wanu alidji okondjimesakani djaho, laate iwo, waolate wasakoli, ino okomaakani mbila djawu. <sup>49</sup>La loyi eeho akili o Mwengei easi ndjo: ikowatomela wasakoli la waposolu, wakoola weti, wakowahelesa wadji, <sup>50</sup>La gboo waonge wato wa ma masio motio ma midjimi e wasakoli kpaa enge eswamate tee la lipoteli e moki. <sup>51</sup>Opoti la midjimi M'abele tee la midjimi ma Zakalya, waolami la milako mpe la minguta ma Mwengei, ndjongo, iyowaaselini, ekohuelama motio la wato wa ma masio. <sup>52</sup>Magba la ino, watiesakoli wa mibeko! la loyi ate olongwesini pungola e oyewi, ase otilingeleni ino amene, alidji wango walukali olingeli, owatekesiani. <sup>53</sup>Ango edjali Yesu owaaseli ndjongo, watiesakoli wa mibeko la Wafalizayo wapotali omwamaleli la omokpomesi sambo ngbi. <sup>54</sup>Wadjali omwaleleli masala la omoheli la maloba makupumbaka la monoko monde laate wamokambe.

<sup>1</sup>La engele eho, wato ngbi wayabolialali ebete e kikima, wadjaali wato inga mbuka, ase wadjali ohotoni, Yesu apotali owasi liwoso la watutiani ate: huakani la levile e wafalisai wadjei la moleho.<sup>2</sup>Ase edjeiti la ema esi, enge eyisani, edjange oeneni; alidji eti la sekele esi enge etiyewane.<sup>3</sup>La ndjongo, sambo djinge ekowasaka ino la likolo ekopumba la hoho, ase enge wokwasaka ino la moli mo sese la wisuki dja ndondo e monguta, ekwasana a likolo la monguta.<sup>4</sup>Aleeti ikoaselakani ino wino wa mbai: otiwangeni wango wakolaka wenge pe la mbuse wakokiti okeli ema teeti.<sup>5</sup>Ase ikoeneseni ino moto ongo okokini omowangi: wangani moto ongo mbuse e owoli adjei la okumu e olumbi la misa. Ndjongo ongo nde iyoyewisini ino mowangani ndji ongo moto.<sup>6</sup>Watitambaka susele itano la ladjene iwale e motiyo mokeke, Mwengei atiwasanaka te mwesi a tina eho.<sup>7</sup>Ase te swee kpa a dja mito manu etangani. otiwangeni; ino oyetini wa susele la motiyo.<sup>8</sup>Ndjongo ikwaselakani ongo akwasa la hoho liwoso la wato ate mbai la inde todjei la oyokani, mana o moto pe akwasa la hoho liwoso e wahumbua e Mwengei ate adjei la oyokani la inde.<sup>9</sup>Ase moto ongo owungani mbai liwoso la wato, wacomowungana inde liwoso e wahumbwa wa Mwengei.<sup>10</sup>Ase moto ongo owasi loi la oyamaleli mana o moto, wacomolimbesa ; ase moto ongo otangi elimo santu wata molimbese.<sup>11</sup>Ango ekookpalani ino la wasinagoga, te liwoso e wadjodji, la makumu, otiasumbweni la ndenge ekwasani ino, te la djinge ekopumbisani ino.<sup>12</sup>Laate elimo santu ekotiesakolani ino ndji enge engele enge ekokini ino owasi.<sup>13</sup>Moto mwesi ndondo ebiba e wato aasali la Yesu ate: Motiesakili, moyewesa manima o mbai akawole wiho wasu wa uma.<sup>14</sup>Yesu amowongweselia: owe ndai obati mbai djodji te mokawoli wa wiho wanu?<sup>15</sup>Ndjongo aasali la iwo ate: angatalani olamu la posa e okondji wiho, laate mokalo mo moto motidje sa la wiho, ingate adjei la wio ngbi.<sup>16</sup>Awahali ehele lisekpe: mbume dja moto ogumake mwesi ewotali olamu.<sup>17</sup>Ndjongo abandali omungoli la motema monde ate: ikokela nde sikalandjo nda eti mbai la ebete la obolei mogono mo mbai? <sup>18</sup>Ndjongo aasali: ikokelaka ndjo. Ikobukolaka minguta ma mbai ma isake la wiho pe ikomaa minge misungu oeti, pe ongo ikobolea pukapuka kpa a pe wihoo ndamu kpa a; <sup>19</sup>Ase ikwasa la molimo mo mbai ate: molimo mo mbai odjei la wihoo wilamu ngbii enge eyisami laate la mbula ngbii. Homa, laka kenga alidji hemela.oyahemelese.<sup>20</sup>Mwengei amwaselia ate: ekete! la likolo lili wakowongo molimo mo owe ndjongo ndai akotota wiho wiwi obondji? <sup>21</sup>Edjei ndjongo laate ongo oyayiseli wihoo wa wotio ase ati mogumake la maiso ma Mwengei.<sup>22</sup>Yesu aasia la watutiani wande ate: eho lenge ikwaselaka ino ate: dheni oyasumboyi la tina e mokalo monu la enge ekolaka te la enge ekokpala la tina e wenge wanu.<sup>23</sup>Laate molimo eeti wilaka alidji wenge eeti wisindje.<sup>24</sup>Wadhendani wayanganga, wationaka, watibukaka, wati la ebete eyisake te monguta moisake wiho, Mwengei akowaalakisaka.<sup>25</sup>Ndai ndondo enu la oyasumboyi wonde, akoki obakesi te engele eikima la bomoi onde? <sup>26</sup>Eho enge inga okokiti okeli loyi enge eeti maakeke, ndandenge okoyasumbwakani la djenge sambo?<sup>27</sup>Denga olamu nda ekoumaka fulele ndamu: itikelaka otomu, etisonaka esindje, etitongaka esindje; ase ikwaselakani ino: te Salomo inde amene la kembo ende kpa a, atikpalali akpaali nda mwesi le eho te.<sup>28</sup>Ndjongo inga Mwengei akokpalisate isoki keke wala wilanga enge ekundu wakolumba la misa, akookpalisani ino oeti, ino wato wa ogemei wokeke.<sup>29</sup>Eho lenge dheni obundoi enge ekolakanani ino la enge ekokengani ino, ase dheni oyasumboyi.<sup>30</sup>Laate djinge wiho kpa, edjei wato wa ekaleli mbe wa moki nde wakolukaka. Sangbanu ayewi ate odjeini la posa eho.<sup>31</sup>Lukaniyo okumu wo Mwengei, djeeti wiho wikoohekelemeni oyeti.<sup>32</sup>Otiwangeni oliye eokeke, laate sangbanu aeni olamu oohi okumu.<sup>33</sup>Tambani wiho wanu ase hekeleni likawo e motema magba. Kelelani molambola enge eigbaka, likondja linge litisilaka ongo likolo enge iwa etiwumaka alidji te ekese etibitisaka.<sup>34</sup>Ase ebete wihoo wamotiyo midjei motema mo owe mokodja ongo.<sup>35</sup>Awongeleni alidji miinda manu elole.<sup>36</sup>Djani nda ato wango wakolambelaka molome o liwala awongwe, laate wamodhukole modhuhe engele ekouma inde la engele ekobinga inde modhuhe.<sup>37</sup>Mwemu la watuke wango engele ekouma molome, akowagboto wasusoi! Iyowaselini meemene, akobata mokaba monde, akowaha ibete eyabatake, akoyandongbala owakeleli.<sup>38</sup>Awume te ndondo e likolo te gboo e likolo, mwemu la watuke wango inga akowagboto wa susoi.<sup>39</sup>Oyewini olamu ate inga meemene monguta ayewake engele enge moto oyiwa akoki odji, akokaki oyabati angbilia, atikokake odhei wabuke etutu e monguta monde.<sup>40</sup>Ino pe yawongeleni la loyi mana o moto akodja la engele enge otiyewani.<sup>41</sup>Petele amowongoselia: iso nde okotowaselaka li lisekpe, inga edjei e wato kpa.<sup>42</sup>Yesu aasia: nda kapita ongo molamu alidji okandela, ongo likumu lande akomobata la osindjili watuke wande kpa ate awahake mawuna minge mibali iwo la engele enge ewongi? <sup>43</sup>Mwemu la motuke mungo likumu lande, ango ekowuma inde akomogboto ndji akokela otomo.<sup>44</sup>Iyowaselini meemene, akomobata ate adje sindjili e wiho kpa.<sup>45</sup>Kaiko nde inga ongo motuke ayaasela ate: likumu la mbai akowumwaka la odji, inga ayabata la weeti watuke wapele la wawali, la olaki, la okengi alidji la olangwi.<sup>46</sup>Likumu e ongo motuke akodja lisio linge inde atimolambela, la engele enge inde atiyewa. Akomoha etumbu e tetelake, akomobata ehola e kikima la wato wati la omeemene.<sup>47</sup>Motuke mungo ayewali posa e likumu lande kaiko atiyawongelali, alidji atikelelali posa ende te, wacomobhinga pimbo ngbi.<sup>48</sup>Kaikonde ongo atiyewali gbondo, kasi akelia sambo ndjinge ewongi laobingami, akobingama pimbo keeke. Moto kpa wamohi ngbi, wakomoongo ngbi, alidji moto ongo wamohekeli mokpali mosungu, wakomoongo sungu oyeti.<sup>49</sup>Idji ololei misa la mbume ase inga eloliana, ikoluka alidji nda ema? <sup>50</sup>Edjei la patisa enge ekoki la mbai ototi, ikookaka magba tee lisiyo linge ndjinge sambo ikoyengemene.<sup>51</sup>Okomungolakani ate idji obati logo la mbume? te ndjongo, oyowaselini; idji obati okawani.<sup>52</sup>Aloyi, obandji sikalandjo, inga edja la wato watano, la monguta, wasato wako amalela waale, ase waale wako amalela wasato.<sup>53</sup>Wato wakokawana: wawa akomomalela mana onde opele ase mana opele akomomalela sango, ima akomomalela mana o moli aseko mana o moli akomomalela nango; okio o moli akomomalela moli o mana aseko moli o mana okomomalela akio onde o moli.<sup>54</sup>Aasia alidji la iwo: engele enge ekoenekeneni ino lipata lilongoiya la elangeli e wuse, okwasakani ate: ewongo egeleli, ekokelamaka ndjongo.<sup>55</sup>Aseko engele

ekoenekeni ino ehoho elongoiya la mbole, okwasakani ate ehela etetelake ekodja, ekokelamaka ndjongo.<sup>56</sup>Wato wa moleho,oyewini odhendji olamu ndenge mbume la likolo ekoeneke ase nda ndenge otiyeweni odhendeli olamu ehele engele?<sup>57</sup>Ndandenge ino amene oyewini ate lu loyi ndjo edjei meemene?<sup>58</sup>Engele enge ekokeke la monguna moowe liwoso la djodji, kela obangu ate anga edjei yo owe la mboka, osilisane la inde, la owangi ate aotube liwoso la djodji, alidji djidji atiohe la mawo ma likumu e wapulusu, mbuse pulusu eolumbe la boloko.<sup>59</sup>Ikowaselakani meemene otipumba; ndji ate opute waadjenge wa wibende e motiyo mokeke enge e gboo

**13**<sup>1</sup>Lainge engele djongo, ndambo e wato wango wadjakali anga, wamosumbelia Yesu enge eetali la wagalileya ate Pilato awanesali makila la enge e nama.<sup>2</sup>Yesu awawongoselia ate: ino ondjimi ate wango Wagalileya nde wakeli masumu oyeti wango weti? ongo okeli iwo djongo? <sup>3</sup>Kasi, eti djongo, mbai iwaaselini inga otikukoleni mitema manu ,okogbani mpe nda iwo.<sup>4</sup>Kasi wango wato liomu la mwambi wawakpeleli etutu esiloe, toase ate iwo wakelali obe oweti wato kpaa wango wayabati la Yelusalema?<sup>6</sup>Pe ahekelia li lisekpe: edjakali la moto mwesi adjakali la moto mwesi la elanga ende e vino, akadija late abuke mbuma adjuiti mbuma te kikima.<sup>7</sup>Asia la watuke wa elanga e vino ate dhenga mbula isato djidji ikodjaka ate ilake mbuma la mu mote idjuitiaka, ase tena mu mote late woni ekohelaka mbume pamba?<sup>8</sup>Watuke wa elanga wa mowongoselia: Likumu, modhee yo ehele mbula ndjo! ikotonga liwela kekeleke eho, mbuse ikolumba isoki.<sup>9</sup>Etimbala masio mageleli ekowota; inga te ndjongo, okomokoto.<sup>10</sup>Ango Yesu atiesakolali ungo wuse la Sinagoga lisio la Sabata. <sup>11</sup>Edjakali la moli mwesi odjakali, la esisi, edjali omowumisi eketi; ilanga liomu la mwambi aimbamakali atakoke oyananoli.<sup>12</sup>Ango e mwenia Yesu ongo moli amwaselia: moli, okaliga la ekoni e owe. <sup>13</sup>Pe amobatelali mawo mpe moli oho akalali mpe amogemeiya Mwengéi.<sup>14</sup>Likumu la Sinagoga amemelia anga omokalesi Yesu moto lisio la Sabata. Asia la wato: edjéi la masio motoba mango makoki ino okeli mosala, djakani okalesame mango masiyo ndjongo, te lisiyo e Sabata.<sup>15</sup>Yesu amowongoselia ndjo: Moto mokosake wato! lisiyo e sabata ndondo enu moto tueti atimotokolaka ngombe ende, te punda ende ebete e lakake la omokengesi malia? <sup>16</sup>Oholo moli addjei mana o Abalayama, ongo etota amonangali ilanga liomu la mwambi ekokiti omotokoli la ehele moliki lisiyo la sabata.<sup>17</sup>Ango edjakali inde owasi djinge sambo waamaleli wande wabandali ooki soni, kasi ebiba e wato kpa wango wadjakali owemeli la djinge sambo ndamu edjakali okeli Yesu.<sup>18</sup>Yesu aasia alidji: nda ema ekwali la okumu o Mwengei, nda ema ekoki mbai oyengemesi la uho? <sup>19</sup>Edjéi nda pukapuka esi e motalada enge moto mwesi atotali, akeeli ooni la elanga ende, ekpomali, ewumali mote mosungu enge mbulu dja likolo widjali owabati la wite wao.<sup>20</sup>Aasia alidji: nda ema ekoki mbai oyengemesi la okumu e Mwengei? <sup>21</sup>Edjéi nda levile enge moli mwesi atotali alidji ayisali ndondo e wimekelo isato wisungu dja moteke tee engele mogbuku mokundali.<sup>22</sup>Yesu akpandali la miki mikeke mpe misungu, otiesakoli mpe obileyi mboka la oki la Yelusalema. <sup>23</sup>Moto mwesi amohuelia ate Likumu toase edjéi ndji la wato wakeke nde wokokala? Inde amowongoselia.<sup>24</sup>Kela makasi late olingele la modhuhe mungo mokeke. Laate iyowaselini wato ngbi wakoluka ate walingele kasi watilingela.<sup>25</sup>Ango ekoyamala memene molako adhike modhuhe, ino wango wadjéi saa kpà okobingani modhuhe, okowasani ate: Likumu, Likumu, to dhukola! Akoowongoselani ate: iyewiti inga odjeini wa ndai. <sup>26</sup>Alidji, okopotani owasi ate: tolakali alidji tokengali la owe ebete kikima, alidji otiesakolali la wa mboka ndjasu. <sup>27</sup>Akowawongesela ate: iyowaselini, iyewiti inga odjeini wa ndai, longwani ahue e mbai, ino kpaa wato wakokelaka sambo odjangi o meemene.<sup>28</sup>Ango nde ekodja oleli la olaki maino, late enge engele okomweneni Abalayama, Isaka, Yakobo alidji watiesakoli kpaa la okumu o Mwengéi onu akoolumbani saa.<sup>29</sup>Wakolongwa likolo la mbole la mabusu kpaa, la ewo e lilome la ewo e moli, la elongéweli e wuse la elangeli e wuse la okulu e Mwengei. <sup>30</sup>Njongo ekodja la wato wa mbuse wakowuma wato wa liwoso, wato waliwoso wakowuma wato wa wa mbuse.<sup>31</sup>Ndji ungo use Falizeo wadjia, wamoaselia ate: longwa alandjo keke laate Elode akolukaka aole. <sup>32</sup>Inde awa wongoselia asia ate: kekeni okamwaseleni enge lisika : dhenda, ikowumaka la witota, ikokalesaka wato wa wikoni keke la ekundu; lisiyo la misato ikosilisa. <sup>33</sup>Ewongi ate mbai isombe keke, la e kundu, alidji une use, ekokiti ate motiesakoli agbe saa e Yelusalema.<sup>34</sup>Yelusalema, Yelusalema, owe moto okolaka watiesakoli, alidji okwabingaka wato wango watomami mabukeli, mbala woni ebalakali mbai ate iwabole wana wowe ebete ekikima? nda ekoboleyaka koko wana wande la mabulu mande, owe otibalali!<sup>35</sup>Dhenga monguta mowe mokotikala pamba, kasi mbai iwaseli ndjo, otienekineni mbai, tee ekowuma engele enge okwasani: Moto ongo okodja la kombo e likumu, ademiane.

## 14

<sup>1</sup>Yesu alingelali use wesi o Sabata, la monguta mo Likumu liesi e wafalizeyo, la olaki ilaka; wa Falizeo wadjali omodendji. <sup>2</sup>Moto mwesi wekoni amalali liwoso lande. <sup>3</sup>Yesu atotia maloba asia la watiesakoli wa mibeko alidji la wa Falizeyo; etekesami, to edimisami omokalesi moto use o sabata?<sup>4</sup>Iwo kpaa wabatia bii, Yesu amokeeselia ongo moto ewo, amokalesia pe amowongolia. <sup>5</sup>Mbuse eho awahueliua: ndai ndondo enu inga mana onde te ngombe ende ekpa la liwela, atibumbesa huse o Sabbata? <sup>6</sup>Waedjali la eyano ewongolake.<sup>7</sup>Mbuse eho awahekelia lisekpe liesi etie wango wato wadjakali anga, awaenia wolukaka oyabati ebete e liwoso. awaselia: <sup>8</sup>Inga moto aowela la lipati otiyabatake ebete e liwoso laate ekodja la moto mwesi o lokumu okoki odji mbuse. <sup>9</sup>Laate ongo oweli ino atidje oowaseli: dheee ehele nbelengo la oholo moto. Okotota soni oki okaabati ehola e gboo.<sup>10</sup>Kasi inga waowela la lipati balaka okabati la nbelengo e e gbo, laate ongo moto ooweli inga adja akoowasela owe ate keke okabate la nbelengo e liwoso, djongo ekookela mwemu liwoso la wato wango waya bati la owe la mesa kikima. <sup>11</sup>Laate moto ongo okoyadjamba, wakomodjimbisa, mpe moto ongo okoyadjimbisa, wakomodjamba.<sup>12</sup>Asia mpe la moto ongo owaweli wato: tango enge okowahekeleke owe wato

ilaka wa midji te wa pokwa, otiwawelake wino wowe, te wamangwa, te pe sangwa la ngwa, te wato wasukani la owe la ogumake laate iwope watiwole eeti huse, waokelele nda owakelelali.<sup>13</sup> Inga owongele lipati wawela: watundake, watowabukei makolo, wato wango wo tengulaka alidji la wango wagbi maiso.<sup>14</sup> Okodja la mwemu late iwo watio wongosela owe ema laate okofutama lisiyo e lisekwa la wato walamu.<sup>15</sup> Mwesi ewato wango wadjakali la mesa, mbuse ooki mango maloba asia la Yesu: mwemu la moto okolaka ilaka la okumu wo Mwengei! <sup>16</sup>Yesu amowongoselia, asia ate: moto mwesi alambesali ilaka ngbi pe awawelia wato ngbi. <sup>17</sup>La engele eho e ilaka amotomia motuke monde ate akawawela wato, late ilaka iweliga.<sup>18</sup> Wato kpaa waongia bolimbisi ate wakokiti odji. Ongo oliwose asia te mbai isombali elanga, djongo iyokeye ndji keke ehele Ndjo late ikahene, limbese mbai. <sup>19</sup>Ongo weti asia mbai isombali ngombe liomi, keke nde okeke mbai okawalakesi. <sup>20</sup>Ongo weti asia ate mbai iyikia moli ndji sikasika ndjo ilongiti oki. <sup>21</sup>Motuke monde awongoyia amwaselia Likumu, la limemu amwaselia motuke monde ate keke obangu la mboka owaweke wato ongo la liwange, odje pe la watundake, wato wabukei makolo, wato wagbi maiso, pe watengumi.<sup>22</sup> Motuke monde amowongoselia: enge etomi owe, ekelami, kasi iholo widjeiyo.<sup>23</sup> Likumu amwaselia keke la mboka wato kpaa wango wakowene owe djaka la iho, late monguta mo mbai motume <sup>24</sup>Mbai iyasi ndjo ndondo e wato wango djongo wawelali mbai watilaka ilaka wa mbai. <sup>25</sup>Wato ngbi wamobilakali Yesu la mboka, ayakukolia pe awadhendja pe awaaselia. <sup>26</sup>Inga moto abila mbai, ewongi amotone Sango, nango, moli onde wana wande, wamango wawali la wapele, ayatone pe inde amene ase akeke odjei motiesakoli mo mbai. <sup>27</sup>Moto ongo atikpala ekululu ende amene, aebilake mbai, ata koke odjei motiesakoli mombai. <sup>28</sup>La ewo ndondo enu inga aenga omai monguta, ewongiyo abundole olamu odengi inga ekomongo Wadjenge woni. <sup>29</sup>Late engele enge ekobanda inde omai esile, late inga atisesé wato wako moseke. <sup>30</sup>Wakwasa la inde ate: oholo moto abandji omayi, akokiti osilisi. <sup>31</sup>Ndji la enge engele, inga Likumu liesi inga aluka ate asanese wita la oeti likumu, akoyabatayo la odhendji inga akoki, la wato koto liomu, tango eti, enge ngambo wadjei la wato koto tuku iwale. <sup>32</sup>Tango enge enika inde ate aekoka akoki o watomi wato ate waokane la kimia. <sup>33</sup>Inga etidje ndjongo, ndjiyo ongo eti likumu adjei yo lihele, akomotoma moto la oongi logoo. <sup>34</sup>Mokpa modjei olamu ngbi, kasi inga mosila oleli oho mokodja kine la tina? <sup>35</sup>Eti olamu la mbume, pe la miutu. Late walumbe saa. Ongo odjei la matoi maokake, awoke.

## 15

<sup>1</sup>Waputesi pako la wato wamasumu wadjali ahue e Yesu la omooki. <sup>2</sup>Wafalizeo la wa tiesakoli wa pui wadjali ondungwani la oowasi ate: oholo moto akoyambaka wato wabe pe aolakaka laiwo mongindji. <sup>3</sup>Awaselila li lisekpe: <sup>4</sup>Ndai ndondo enu inga adja la kondolo kamakikima, inga aungesa esi, ewongiti atikeyo djinge tuku libwa la libwa la esobe, late ake oluki enge esi ewungi tee ekomwene inde? <sup>5</sup>Ango enia inde enge esi akoekpala la mwemu la makookoto. <sup>6</sup>Ango ewongoiya inde la monguta, awelia wino wande la wato wango wasukami la inde, aasia la iwo ate: yemeleni mongindji la mbai, laate iyesi kondolo embai ewungi. <sup>7</sup>Edjei ndenge kikima inga mopagano mwesi akukola motema ekodja la mwemu osungu ongo likolo weti wato tuku libwa la libwa wango walamu wango wakokiti kine okukoli ekaleli. <sup>8</sup>Alidji inga moli mwesi adjei la wadjenge liomu e wibende, inga awungesa esi, ati lolwa lotambe akpase monguta aluke olamu tee ekoene inde eho? <sup>9</sup>Inga aenia, akowawela waino wande la wango wayabati ehola kikima la inde akwasa: yemeleni la mbai mongindji, laate iyesi adjenge enge ewungisi mbai. <sup>10</sup>Edjei ndenge kikima ekowaselakani mbai, edjei la mwemu etie wana wa Mwengéi inga moto mwesi mopagano akukola motema. <sup>11</sup>Asia aleeti ate: moto mwesi adjakali la wana wapele wale. <sup>12</sup>Ongo elenge amoaselia sango ate: wawa pekele mbai esuki elikondja wungo okoki la mbai pe sangbu awa kawelelia ogumake wonde. <sup>13</sup>Mbuse emasio makeke ongo elenge atotia ogumake wonde akia la eeti moki mwesi molihele; ongo abitisali ogumake wonde la ekaleli e witeba. <sup>14</sup>Ango esesia inde Falanga kpaa djala EWumia la mungo moki, olaki wonde wowumia la minga. <sup>15</sup>Akalukia otomu etie moto mwesi; ongo Likumu amotomia ate akakengelaka nama dja nde. <sup>16</sup>Adjali la posa olaki wilakate wangulu, moto tueti adjali omohi te ema. <sup>17</sup>Inde amene abandia oyaseli la motema: wawa adjei la watuke ngbi, pe wadjei la ilaka ngbi mbai iyogbaka ndjala ahala ndjo. <sup>18</sup>Ikolongwa ahalandjo iwongwe etie wawa, ase ikomwasela ate: wawa mbai ikeli obe. <sup>19</sup>La maiso ma Mwengéi, alidji la maiso ma owe, wotitotekine mbai nda mana owe, tota mbai nda motuke mowe. <sup>20</sup>Ayamalia ayadjimbai mboka owongoi etié sango, ndji edjaki inde yo lihele, tango emuenia sango magba ma mokelia akia obangu okamokweli la kingo amolingia. <sup>21</sup>Mana amwaselia ate: wawa mbai ikeleli likolo obe mpe lowe okokiti kine ototi mbai nda mana owe tota mbai nda motuke mowe. <sup>22</sup>Sango asia la watuke wande, kelani obangu djaka la isindje ilamu sikasikandjo omokpaleseni; mobongani mpe mopete la mosei mpe omokpaleseni wipokpo la makolo. <sup>23</sup>Djakani la mana o ngombe opele omaita omooleni, tomolake, toemele. <sup>24</sup>Laate mana o mbai oholo ogbakali, awongoi la mokalo; awungali, awongoi. Wapotali oemeli. <sup>25</sup>Ndjoka manango eloko adjakali la ilanga, anga ewongoiya inde la moki aokia sa ngungu la mbonda ikobinga. <sup>26</sup>Amowelia mou mwesi a mohoelia tina engungu la mbonda. <sup>27</sup>Motuke moho a moaselia ate mangwa nde owongoi uho wungo oli sangwa mana ongombe opele omatamu, laate amweni wenge olamu. <sup>28</sup>Inde amemelia, atonia o lingeli ongo la lopango lou, sangbau apumbia ayakongia la inde ate alinge. <sup>29</sup>Kasi amohongoselia sango: denda mbula ngbi ikokelaka otomu woowe, itibukaka mibeko moowe; owe use te okikikima ohala mbai mana ongombe opele ate ikele lipati la wino wa mbai. <sup>30</sup>Ango owumia mana owe ongo olaki Falanga djowe la wali wa ndumba omokelia lipati. <sup>31</sup>Sango amowongoselia: ate mana o mbai, owe nde odjei la mbai ebete ekikima, iho ndjo kpaa wa mbai widjei wowe. <sup>32</sup>Ewongi tokele lipati, toemele, laate maangua ongo ogwaki awongoi la makolo, awungaki aenania.

## 16

<sup>1</sup>Yesu awaselia alidji watutiani wande ate, moto mwesi ndjongo adjali moto mo gumake ngbii, ase adjali la kapita onde mwesi. Wato wadjali omwaseli ate akobitisaka wiho wande sa ndjongo. <sup>2</sup>Ndjongo amowelali amwaselia ate: nda loi okookaka mbai atie owe? hekele mbai la Polo wo wotomu woowe, alikambo ate otoamalela kine alidji wungo wotomu? <sup>3</sup>Ndjongo kapita oho asia la motema monde ate; ikele woni nda epotia Likumu la mbai olongosi mbai la wotomu? Iti la wokulu wo obuki. iongolo? Ikooka soni. <sup>4</sup>Iyewi wungo wokela mbai alikambo ate wato wabatese mbai la minguta mawu anga okondongose iwo mbai la wotomu. <sup>5</sup>Ase amowelia moto mwesi la mwesi ongo odjali la nongo e Likumu lande ase amwaselia ongo opoo ate: odjei la nongo woni e Likumu la mbai? <sup>6</sup>Asia ate: teni kama esi e maita ma olive, amwaselia ate tota ekpata e tuku itano. <sup>7</sup>Mbuse eho asia la ongo odji ate, ase owe odjei la nongo woni? asia ate: saki kama e ndongo. Amwaselia ate, tota ekpata e owe e wookani dhiga tuku mwambi. <sup>8</sup>Ase Likumu lande amondjimali kapita oho. Te nda etidjakali inde moto molamu, alikambo ate aeneseli lokenge wonde. Alikambo ate wana wa muu moki wadjéi la lokenge la ehele engele wou, owaleki wana wa moi. <sup>9</sup>Alidji iyasi la ino ate wakelesani wino wanu la mboka e wogumake enge eti la womemene, alikambo ate anga ekosila woho, iwo wakowemeleni ino la wibete e wabati libela. <sup>10</sup>Ongo moto odjei memene a loi wokeke, adjéi koto memene a loi wosungu, ase moto ongo oti memene te aloi wokeke ati koto memene a loi wosungu. <sup>11</sup>Nde ndjongo inga otini memene a loi wowogumake wungo wodjangi womemene, ndai okohani ino wogumake wo memene amene? <sup>12</sup>Ase inga otidjeni memene la ema e moto odji ndai okohani ino ema enu amene? <sup>13</sup>Moto owotomu la ndondo e monguta aengiti odjei motuke mo makumu male, alikambo ate akomotona ongo, la akomobala ongo odji, te okoahela la odji la akomodhe odji. Woengitini odjei mituke ma Mwengéi alidji ma waambe. <sup>14</sup>Sikahala wa Falisayo wato wabali wadjenge wadjali oki djihinge sambo kpàa, ase wapotia omoseki. <sup>15</sup>Yesu awaselia ate: ino, nde wato wanga wakoatoloko ino amene wato wa memene liwoso la wato ase Mwengéi aewi mitema manu, alikambo ate ema elamu la maiso ma wato edjei ema e wonalili la maiso ma Mwengéi. <sup>16</sup>Pui la otiesakoli edjakali tee la Yoani. Pota ndji la engele enge mboli ndamu e wokumu wo Mwengéi ekoasanaka ase wato kpàaa wakogueleke okii atie eho. <sup>17</sup>Memene, eti obe ate likolo la mbume lileke la ebete ate ma esuki eikima e pui engesame. <sup>18</sup>Moto kpàa ongo oli liwala la moli onde ase amoikia odji, akeliga eteba ase moto ongo omoiki moli ongo ooli liwala la molome onde akokelaka eteba. <sup>19</sup>Ase moto mwesi ndjo adjali mogumake, ase adjali okpali wisindje witanake ngbaa la oemeli wuse la wuse, adjali la wiho wilamu wilamu mene. <sup>20</sup>Ase moto o wiongolo mwesi nkombo ende Azalo, adjali olangali liwoso la modhuhe monde, wenge wande witumu la mpota. <sup>21</sup>Ase inde odjakali la ehoha e olaki wilaka winge widjakali okwakani sese emesa ma moto oho owogumake. Mbwa idjakali odji ohelekolé pota djande. <sup>22</sup>Ase mbuse moto wiongolo oho aguya, waahumbua wa mototia wamobatia la mokpoto mo Abalayama. Moto owogumake aguya koto wamokundjia. <sup>23</sup>Ase la ndondo e kabuli adhukolia maiso mande anga edjakali inde la wodjidji, ase omoenia Abalayama lihiele la Lazalo la mokpotomonde. <sup>24</sup>Ndjongo awelia ase asia ate wawa Abalayama ndjokela mbai magba ase motoma Lazalo alulie mosei monde la malia ase adhokesele mbai la lolemi, alikambo ate ikoeneke wodjidji wo misa minge mikololaka. <sup>25</sup>Ase Abalayama amwaselia ate: mana otiwosanake ate anga odjakali owe la mokalo odjakali la wiho wilamu wilamu ngbii, ase Lazalo atidjakali la wiho. Sikalandjo aumiga olamu ahala; kasi owe okoeneke odjidji. <sup>26</sup>Olongosi djinge sambo kpàa, liwela liesi lisungu litokawanesi iso la ino ase wato wanga wabali olongoi ahala wake atie nu waengiti ase la wato wa olongoi ongo la okpandji atie su watikoke okeli. <sup>27</sup>Moto oogumake asia ate: nda edjei eho ndjongo iwongi owe, wawa motoma ongo la monguta mo wawa. <sup>28</sup>Alikambo ate idjei la wamanima itano wapele, alikambo ate awasele wolamu wolamu, alikambo ate iwo watindje ahala la wuhuwu. <sup>29</sup>Ase Abalayama asia ate, wadjéi la Moize, la waaseli; wa waoke iwo. <sup>30</sup>Moto e ogumake aasia: Te ndjongo wawa Abalayama, inga moto mwesi ndondo e wato waguake akee atie wu wakohengese mitema. <sup>31</sup>Ase asia la inde ate inga watimoke Moize la waseli te, watondima koto te moto ongo agui ase abasia la logo.

## 17

<sup>1</sup>Ndjongo asia la watutiani wande ate, sambo djinge ikobingesaka ekikimi itodjangaka te. Ase magba la moto ongo okodjaka la djaho. <sup>2</sup>Ewongi wolamu wa monange libukeli la nkingo linge likokpotokolaka iwo la pukapuka, ase wamolumbe la ebale, la ebete ate amobingese mwesi o wato wakeke ekikimi. <sup>3</sup>Huakani inga mangua akela lisumu mopamela ase inga ahengese motema, molimbese. <sup>4</sup>Te inga aokelela obe mbala nsambo la wuse wesi ase adjia atie owe mbala nsambo asia ate ihengesiga motema ewongi omolimbese. <sup>5</sup>Watutiani wasali la Likumu ate totaliela iso wondimi. <sup>6</sup>Ndjongo Likumu asia ate inga odjakini la wondimi wosungu nda pukapuka e Motalade, nda owasini la mote ate abukola ase keke oyawoni la ebale, mote mokootosani. <sup>7</sup>Ndai ndondo eenu ongo odjei la motuke ongo okobukaka mbume, te ongo okokengeleke nama akoasa la inde engele ewongoiya inde la elanga ate djaka ahala galagala abata la mesa? <sup>8</sup>Akwasa ndji ate: wongele mbai ilaka, kpala esindje, hekele mbai ilaka tee ekolaka mbai alidji e e kokenga mbai, mbuse eho, owe okolaka alidji okokenga? <sup>9</sup>Akomoemele nde mungo motuke alikambo akeli sambo djinge imotomi iwo ate akele? <sup>10</sup>Ndji ndjongo ino koto anga okosesela ino okeli sambo djinge eyotomini iwo ate okeleni, asani ate todjei mituke mpamba wungo wokeli iso ewongi tokele. <sup>11</sup>Ase anga ekeli inde la Yelusalema alekia ndondo e Samalia la Galilea. <sup>12</sup>Ase anga elingelali inde la moki mwesi ndjongo wato wapele liomu wanga wadjakali la ekoni e mbala wagbotononia lainde ase wamalali lihile. <sup>13</sup>Wapotali omowaseli: Yesu mwalimo, ndjokela iso magba. <sup>14</sup>Ase anga ewaeneli inde asi ala iwo ate: kekeni okayainiani atie wanganga Mwengéi. Ndjongo anga edjakali iwo oki, wakalali ndji la mboka. <sup>15</sup>Anga weneli mwesi owu ate akaliga, akawongoya akomoemeleke Mwengéi la moli mopamake. <sup>16</sup>Ase akuiya panda la sese e makolo ma Yesu ase amohekelia keke dhinge; kaikonde adjali Mosamalia. <sup>17</sup>Yesu awongosia ate: te wato liomu nde wakali? ndjongo wanga wadji libwa wadjéi eni? <sup>18</sup>Moto tweti te atiwongwali omotemei Mwengéi, ndji moto ongo o etondo edji? <sup>19</sup>Ase asia la inde

ate, Amala, keke, wondimi wo owe e okalesi.<sup>20</sup> Ase wa Falizeyo wamohuelia, nda engele ekodja okumu wo Mwengéi, Yesu awawongoselia: okumu wo Mwengéi wotidja la ndenge enge wato kpàa wakoki oyewi.<sup>21</sup> Etiyasana ate: adjei ala, inga: adjei ongo, laate dhenda, okumu wo Mwengei wodjei mongindji la ino.<sup>22</sup> Ndjongo asia la watutiani: masio mageleli ango ekodja ino la ehoha e woeni wuse wesi wo mana o moto ase otieneni.<sup>23</sup> Ase wato wakwasa la ino ate dhendani ongo! te dhendani ahala! otiumakeni te otiwatutiakeni.<sup>24</sup> Aloyi ate, ndji nda ndenge ekobalimaka mokalikali ango ekongengaka muho mokoumaka opoti la ebete esi ongo likolo weneni e Mana omoto ekodja ndji ndjongo.<sup>25</sup> Ase awongi liwoso aene yo odjidji ngbii la wolie wungo wokomotona inde.<sup>26</sup> Alidi, ndenge edjakali la masio ma Noa, ekodjaa ndji ndjongo la wuse wo mana omoto.<sup>27</sup> Wadjakali olaki, la okengi, pele idjakali woiki wali, wadjakali woikesani tee ndji wungo wuse wo Noa alingelali la masua, ase mpela ekadjia, ase ewaolia iwo kpaa.<sup>28</sup> Ekodjaa koto ndenge edjali eho la masio ma Lota wadjakali olaki la okengi osombi la otambi, oni, omai minguta.<sup>29</sup> Ase wungo wuse wopumbali Lota la Sodoma, misa misungu milongwali ongo likolo miluya ase miwaolia iwo kpaa.<sup>30</sup> Ekodjaa ndji ndjongo wuse wungo wokoene mana omoto.<sup>31</sup> Wungo wuse ndjongo, moto ongo okodjaa likolo la monguta, ase wiho wande widjéi la monguta atiadjimba ototi, te la moto ongo odjéi la ilanga, inde atikawongwa ototi wiho wande.<sup>32</sup> Momungwani moli o Lota.<sup>33</sup> Moto kpàa ongo okulukaka okalesi wenge wande akowiungesa waho, ase ongo owungesi waho akobania mokalo.<sup>34</sup> Ikowaselakani ino la linge lisio, wato wale wakolangala la epe, mwesi akokee mwesi akotikala.<sup>35</sup> Wali wale wakotanga la eboka eikima mwesi akokee, mwesi akotikala.<sup>36</sup> Wato wale wakodja la elanga Mwengéi akomotota moesi, akomotika mwesi.<sup>37</sup> Ndjongo wamowongoselia ate: nda ebete likumu? awaaselia ate: ebete elangali molonda, koka koto ikwabolia.

## 18

<sup>1</sup>Ndjongo Yesu awahali ekpangele esi alikambo la owaenesi gbondo ewakongi wiengele kpàa te olembi. <sup>2</sup>Asia: la djodji mwesi ndjo atidjakali omowangi Mwesi ongo odjakali omowangi Mwengéi la omodemei moto tweti.<sup>3</sup> Ase la moki moho, edjakali la moli mwesi ongo ogeleli la molome ase adjakali oki mbala la mbala atie inde la omowaseli ate: kela ate imolonge moto ongo okosambaka mbai la inde.<sup>4</sup> La woumoi wo engele esindjo, adjakali okili. Ase mbuse asia lamotema monde ate: te ndenge itimowangaka Mwengéi, te itimodemiaka moto.<sup>5</sup> Ase nda moli oholo ogueli molome adjéi wiengele kpàa ondembesi mbai, ikokela ate alonge, laate atidje masio kpa ondembesi mbai.<sup>6</sup> Ndjongo Likumu abakesia: okani nda easi ohongodjodji mobe.<sup>7</sup> Ndjongo Mwengéi atikela ate loi lo wato wande wango awawonoli inde, wango waomowelakolaka likolo la moi lititenie la womemene nda ekowaeneseke inde motema molai? <sup>8</sup>Iyowaselini, akowakelela galagala meemene. Ase ango ekodja mana omoto akogboto alidji wondimi ahala la mbume? <sup>9</sup>Awaaselali leeti ekpangele la loyi ewango wadjali owayewi ate wadjei wato walamu, wadjali owatoni weeti wato.<sup>10</sup> Wato waale watelali la tepelo oyakongi; mwesi mofalizeo, ongodji moputesi pako.<sup>11</sup> Mofalizeo ayamalali apotia oyakongi la owasi sambo dja motema monde ate ee Mwengéi, iyodemei alikambo iti nda wato wadji te, wapuesi, wato wadjangi womemene wato wa eteba te koto nda moputesi mamelo oholo.<sup>12</sup> IKokilaka wilaka mbala la iwale la poso esi, ikohekeleke esi eesuki e liomu e wiho kpàa wikondjaka mbai.<sup>13</sup> Ase moputesi mamelo, amalia lihiele atibalakali te odendesi maiso mande likolo, ase adjakali waabingakoli la mokpoto monde la owasi ate ee Mwengéi ndjokela mbai magba mbai moto mobe.<sup>14</sup> Iyowaselini ango oholo moto awongwali la monguta monde, aeneneli nda moto molamu; kasi te Mofalizeo. Eho, moto ongo okowatelesa, akoadjimba, kasi ongo okoadjimbasa, akotela.<sup>15</sup> Kaikonde wato wapotali omodjeli la wana wau wakeke wakeke alikambo awapote pote, ase ango weneli wa tutiani ndjongo, wapotia owapameli.<sup>16</sup> Kasi Yesu awawelali wana waho wakeke wakeke wadje atie nde; ase asia ate: wadheni wana wakeke wakeke wadje atie mbai otiwatekeseni, laate okumu o Mwengei wodjei e wato wango waengeni la iwo.<sup>17</sup> La meemene ikowaselakani ino ate moto kpàa ongo ondjimi wokumu wo Mwengéi nda mana mokeke te atolingela la wuho te okeke.<sup>18</sup> Ase moto mwesi amohuelali poopoo, asia: mwalimo molamu, ikele woni alikambo ikondje liwongoseli la mokalo mo libela? <sup>19</sup>Yesu amwaselia ate: lalikambo lande okowelaka owe mbai molamu? moto molamu ati te, longosa sa mwesi Mwengéi.<sup>20</sup> Woewi pui, otikelake eteba, otiasake moleho, otiolake moto, otiwake, modemia sangua la ngua.<sup>21</sup> Ndjongo ongo moto asia ate: idemei djinge kpàa tee opoti wo lenge wo mbai.<sup>22</sup> Mbuse ewoki ndjongo, Yesu amwaselia ate: edjéi la ema esi enge edjangi owe tamba wiho kpàa winge widjéi owe la waho ase wakawela watundake ase okokondja ema e motio ongo likolo ase djaka tutia mbai.<sup>23</sup> Ango okia inde ndjongo aokia magba ngbii alikambo adjali la ogumake.<sup>24</sup> Yesu amodendia ase asia ate: ekodja loi womonga amene alikambo la wango wadjéi la wadjenge walingele la wokumu wo Mwengéi! <sup>25</sup>La memene, olingeli wokamela la bu etonga edjéi petee oleki olingeli wo moto mogumake la wokumu wo mwengei.<sup>26</sup> Wango wadjali omooki waasali: ndai okoki okali? <sup>27</sup>Awaaselia ate: sambo djinge iyengiti okelami, la likkambo la wato, iyengi okelami la likambo la mwengei.<sup>28</sup> Ase Petele asia ate denda! iso todhei wiho wasu amene ase totuteya owe.<sup>29</sup> Asia la iwo ate: lamemene iyasi la ino ate eti la moto tweti ongo odhei monguta monde te moli onde, te wamanango wa pele te wamanango wa wali te wawoti te wana alikambo la wokumu wo Mwengéi.<sup>30</sup> Ongu okodjanga okondji ngbi la ehele engele, la moki mogeleli, te la mokalo mo libela.<sup>31</sup> Ndjongo awawelia watutiani liomi la wale kekeleke, ase asia la iwo ate denda! tokotelaka la Yelusaleme ase sambo djinge kpàa idhingamali la waseli alikambo la mana omoto yengesame.<sup>32</sup> La ekpangele wakomokawa, la mawo ma wato wa miki ase wakomoseke, ase wakomosambwesa wobe, la wakomosuele nsoi.<sup>33</sup> Ase mbuse e omobingi inde pimbo wakomola ase wuse wo misato akosusua. akosusua.<sup>34</sup> Kaikonde watihelali gbondo e djiingese sambo djaho, la eyaseli enge watiyewali olimboli.<sup>35</sup> Ango edjakali inde oumi ahue la Yeliho, moto mwesi ogui maiso ayaabatali kekeleke e mboka wongongi wiho.<sup>36</sup> Nda eokali inde wato ngbii wakolekaka, apotali ohuela huela inga edjéi nde.<sup>37</sup> Wamoewsia ate Yesu o Nazaleta indongo okolekaka.<sup>38</sup> Ndjongo apamia ase asia ate Yesu, mana o Dawidi ndjokela mbai magba! <sup>39</sup>Ase wato wango wadjakali osombi liwoso

wapotia omopameli ate anange monoko, ase adjakali ndji opami abolo alidji oleki ate: mana o Dawidi ndjokela mbai magba.<sup>40</sup> Ndjongo Yesu amalia ase atomia wamodjele la moto oho. Mbuse eho ango oumali inde ahue, Yesu amohuelia ate:<sup>41</sup> Obali iyokele nde? inde asia ate Likumu ipote oeni.<sup>42</sup> Ndjongo Yesu asia la inde ate pota eni, wondimi wo owe wokalesi.<sup>43</sup> Ndjji la engele eho apotia oeni ase apotia omotutei inde ase omodemei Mwengéi, alidji ango weneli wato kpàa ndjongo wamodemiali Mwengei.

## 19

<sup>1</sup>Yesu, alingelali la Yeliiko, akpandali liwange. <sup>2</sup>Edjali la motopele mwesi la kombo Djakayo, adjali Likumu e waputesi mamelo, alidji, adjali moto e ogumake. Alukali oeni Yesu. <sup>3</sup>Ase atikokalii omweni, la tina e ebiba e wato, laate adjali mokwe. <sup>4</sup>Atilali liwoso, atelia la mote laate amoene, late Yesu apotali oyeti la enge mboka. <sup>5</sup>Sikalandjo ango Yesu awumia la ebete ehoo, adhendali likolo amwaselia: Djakayo, adjimba sese; late keke ikoyabata la monguta mo owe. <sup>6</sup>Djakayo ayadjimbali sese, ase amototali la oyemeli. <sup>7</sup>Ango eenia iwo ndjongo, iwo kpàa wabandali ondungwani, pe owasi ate: alingelia oyabati atie moto ongo owungu. <sup>8</sup>Ase Djakayo, ayamalali liwoso la Likumu omwaaselia: dhenda, Likumu, ndambo dja wihoo wa mbai ekohekele la watundake. Pe ema kpàa epwesali mbai moto, la ohengeli, ikowongola ehoo mbala inéi. <sup>9</sup>Yesu amwaselia: la lisio la keke mokalo molingeli la mu moguta, late inde pe adjei mana o Abalayama. <sup>10</sup>Late mana o moto adjali a tina e oluki la okalesi wato wango. <sup>11</sup>Wango wadjali ooki djinge sambo, Yesu ahekeleli alidji eeti ekpangela, late adjali ahue e Yelusaleme, pe wadjali la mamungo ate Okumu e Mwengéi wokenene ndji enge engele. <sup>12</sup>Ndongo aasali ate: motopele mwesi la kita a akelali okendo la moki mwesi e lihele laate ayawumese likumu, mbuse awongwe. <sup>13</sup>Awelali mituke mande liomu, awahekelia wambele liomo, mbuse awaaselia: kelani milunga tee ekowongwa mbai. <sup>14</sup>Ase wana wa moki wa motonali, alidji wamotomelali wato mbuse ende, waasia ate: tobaliti ate moto oholo awume Likumu lasu. <sup>15</sup>Ango ewongwea inde mbuse, e ototi okulu e Likumu, awalali mituke wango awahekeleli iwo wambele, la oyewi nda litomba etoti iwo la milunga. <sup>16</sup>Ongo poo adjia, aasia: Likumu, wambele wa owe ewoti wambele liomu. <sup>17</sup>Ndjongo amowaselia ate: Edjéi olamu, motuke molamu, late oenesi ate odjéi la omeemene la sambo keke pendja, okotota Okumu likolo la gbata liomu. <sup>18</sup>Ongo wale adjia, aasia: Likumu wambele enge owe ebakesi wambele itano. <sup>19</sup>Aasali la inde: owepe, tota mokpali la gbata itano. <sup>20</sup>Weti adjali, ahasia: Likumu, dhenga wambele dja owe, ihsali ehoo la esindjé. <sup>21</sup>Late idjaki oowangi, la loyi odjéi moto o minga; okototaka enge otihisali alidji okobukaka mbuma enge otionali. <sup>22</sup>Amwaaselia ate: ikoosambesa ndji la enge eyasi owe la monoko moowe amene; motuke mobe, oyewaki ate idjéi moto ominga, ikootaka enge ehisiti mbai, alidji ikobukaka mbuma enge eoniti mbai. <sup>23</sup>Woni otiyisali wambele waa mbai dja wibende la baki laate ango ekowongwa mbai itote la asumbelia? <sup>24</sup>Alidji aasia la wango wadjali ango: mopwesani djinge falanga, mohekeleni moto ongo odjei la wambele liomu. <sup>25</sup>Wamwaaselia: Likumu inde adjei la wambele liomu. <sup>26</sup>Iyo waselini, moto kpàa ongo odjéi la ema wako mohekele ngbi, ase ongo oti la ema, wakomopwesa te enge edjaki inde la eho. <sup>27</sup>Watoni wa mbai wango watibalali ate iwume Likumu la wu, djaka la iwo ahala, wawolani liwoso la mbai. <sup>28</sup>Mbuse oasi ndjongo, Yesu asombia liwoso la ebiba ewato, late ate la Yelusalema. <sup>29</sup>Ango eyandongbali inde ahue e Betefage la Betania la mokoli wakowelaka mokoli ma oliva, atomali watesakoli wale. <sup>30</sup>Aasia: kekeni la moki mungo modhendani la ino; mbuse olingeli ndondo, okogbotoni mana opunda wamonangi moliki, moto tueti atelakiyo likolo lande; motokolani djakani la inde. <sup>31</sup>Inga moto aohuelani: nda ndenge okomotokolakani? okokini oasi ndjo: Likumu adjei la posa eho. <sup>32</sup>Wango wawatomali wakeeli, wagbotoli ndji nda ndenge Yesu awaaselali. <sup>33</sup>Ango wadjali otokoli mana punda wamemene ehoo wawaselali ate: nda ndenge okotokolakani enge mana o punda? <sup>34</sup>Wawawongweselali: Likumu adjei la posa eho. <sup>35</sup>Wakpalali ongo mana o punda atie Yesu, walumbali wisindjé wawu likolo la ongo mana o punda pe wamobatisali Yesu likola laho. <sup>36</sup>Ango edjali inde osombi, wato wadjali owandji wisindjé wawu la mboka. <sup>37</sup>Ango ayandongbia inde la Yelusalema, ngambo eyadjimbali la mokoli mo oliva, watutiani wapotali oemeli, alidji olembeli Mwengéi la moli likolo la loyi e sambo kpaa kamwake eenali iwo. <sup>38</sup>Wabandali oasi: opambwame owe Likumu ongo okodjaka la kombo e Mwengéi! logoo e likolo pe ekumesame wiholo wieti likolo. <sup>39</sup>Ndondo e wato, weeti Wafalisai waasali la Yesu: Motiesakoli, wapamela watutiani wa owe. <sup>40</sup>Yesu awawongoselali ate: ikoyewisakani inga iwo waybata logoo mabukeli ma kopama! <sup>41</sup>Ango ehumali inde la gbata, Yesu adhengali ateniali la ilelo liko laho, pe aasia. <sup>42</sup>Inga owe, ososolali la lisio la keke sambo dja logoo! sikalandjo eho eyayisi la maiso ma owe. <sup>43</sup>Late masio ekodja la tina owe, la tango eho watonani wa owe wakolinga lopango makasi wakokela lisukaka ahue e owe mpe wakonanga owe la lisusuka kpàa. <sup>44</sup>Wakoola, owe alidji wana wa owe ndondo e owe, watidhee libukeli teeti likolo la libukeli eeti, la loyi otibalali oyewi engele enge odhendamaate. <sup>45</sup>Alingelali la tempelo, ase abandali oumbi la wango wadjali otambi. <sup>46</sup>Aasali la iwo: edhingami ate: monguta mo mbai ekodja monguta mo oyatati ase ino, owumesia ehoo ebete e iwa. <sup>47</sup>Adjali ohinye masio kpàa la tempelo. La makumu dja mangumba, la wadingeli la wato wasungu wa miki wadjali olukani omowoli. <sup>48</sup>Ase watiyewali ndenge ototi, late wato kpoàa wamoyokali la owangi.

## 20

<sup>1</sup>Mwesi la enge masio, Yesu adjia otiesakoli wato ndondo e tepelo, adjali owasumbeli mboli ndamu. Wiloko e wanganga Mwengei la watiesakoli wa mibeko, la wiloko wadjaali. <sup>2</sup>Wamwaaselia: towasela nda okumu okokelaka dji sambo, alidji ndai aohi ehele okumu? <sup>3</sup>Awawongoselia: mbai pe ikohuelakani poopoo esi, ndjaselani mbai, <sup>4</sup>Patisa e Yoani edji la likolo inga la wato? <sup>5</sup>Wabandali obundoyi iwo amene: inga towongosa ate: elongoyi likolo, akwasa ate, wonini otimondjimalini? <sup>6</sup>Alidji inga towongosa ate: elongoyi la wato, watokpa wakotobinga mabukeli, laate, watokpaa wayewi ate Yoani adjali mwaseli. <sup>7</sup>Wamowongoselia: wayewiti inga edji eni. <sup>8</sup>Yesu awaaselia: mbai pe itiwaselani nda okumu ikokelaka dji

sambo.<sup>9</sup> Abandali owaseli wato li lisekpe: Moto mwesi aonali elanga e vino, awahia watuke, akia okendo e masiyo ngbi.<sup>10</sup> Ango ewumali masiyo mabukake vino, amotomia motuke monde mwesi atie watuke wa elanga e vino, laate wamohekele djinge ebuki iwo la elanga e vino. Watuke wa elanga e vino wamobingia, wamowongosia mawo ohola.<sup>11</sup> Amotomia weeti motuke monde, wamobhingia inde pe, wamotangia alidji wamowongosia maho ohola.<sup>12</sup> Amotomia ongo osato, wamokotokolia, alidji waumbia la inde.<sup>13</sup> Memene elanga e vino aasia: ikokela woni? Ikomotoma mana o mbai o libhalano, eti mbala, anga ekomwene iwo, wakomotosa.<sup>14</sup> Kasi anga watuke wa elanga e vino wamwenia, wabhundoyia iwo amene, alidji waasia: dhenda ongo okotikalela la ogumake. Tomoole, laate ogumake eume esu.<sup>15</sup> Wamulumbia saa e elanga e vino, alidji wamoolia. Sikalandjo memene elanga e vino akowakela woni? Akodja, akoola wango watuke kpa wa elanga e vino, akoha elanga e vino la weeti wato. Ango eokia iwo ndjongo, waasia: ekokiti odjei ndjongo.<sup>17</sup> Kasi Yesu awadhendali, aasia: eyinei woni enge edhingami ate: Libukeli enge elumbali wamai, ewumali likule la monguta? <sup>18</sup>Ongo moto okokwa likolo la enge libukeli, akokondjoa, alidji ongo moto enge libukeli ekomokwela, ekomwandjakola.<sup>19</sup> Wiloko e wanganga Mwengei, la wiloko e watiesakoli wa mibeko, walukali ate wamohele ndji enge engele, kasi wadjali owangi wato. Wayewali ate edjei loyi ewu nde Yesu ahali linge lisekpe.<sup>20</sup> Wabandali omodhendji Yesu, alidji watomali wato wayakele ate wadjei wato walamu laate wamohele la eyaseli e inde amene, ase wamohe la okulu alidji la okumu e likumu e moki.<sup>21</sup> Wamohuelali ehele poopoo: Mwalimo, toyewi ate okwasaka alidji okotiesakolaka la meemene, alidji otidhenaka elongi, kasi okotiesakolaka mboka e Mwengei la meemenekpa.<sup>22</sup> Endjimami, inga etindjimane ate toputa limelo e Sezale? <sup>23</sup>Yesu ayewali mamungo mau mbe, awawongoselia: woni okwalelekani mbai lisala? <sup>24</sup>Inyani mbai enge adjenge. Ehele edjei elongi e ndai alidji madhingo ma ndai? Wawongosia: e Sezale.<sup>25</sup> Awaaselia: hani Sezale enge e Sezale, enge e Mwengei la Mwengei.<sup>26</sup> Watimohelali la ema teeti e obe la enge edjali inde oasi liwoso la wato, wakamwali la ewongweseli ende, wayabatali bi.<sup>27</sup> Weeti Wasadukayo, wango wakwasaka ate obasi la logo oti, wayandongbali, wamohuelia Yesu ehele poopoo: <sup>28</sup>Mwalimo, dhenda ehele Moize atodhingelali: inga moto opele ongo oyiki agwa, atikiti wana, maananga akomoyika moli ongo omotiki inde, laate awotele maanango wana.<sup>29</sup> Kaikonde, edjali la wana wapele sambo. ongo oliwoso ayikali, agwiyia te otiki wana.<sup>30</sup> Ongo o wale ayikia ongo moli ogweli, inde pe agwiyia te otiki wana.<sup>31</sup> Tee ongo osato amoyikia; ekeli ndenge kikima la iwokpa sambo watikiti wana.<sup>32</sup> Mbuse moli pe agwiyia.<sup>33</sup> La obasi e logo, akodja moli ondai? laate iwokpaa wamoyikali.<sup>34</sup> Yesu awawongoselia: pele la wali wa mu moki wakoyikanaka; <sup>35</sup>Kasi wango wakoenene olamu olingeli la moki mungo mokodja, mbuse e obasi e logo, watiyikana alidji.<sup>36</sup> Watigwa kine alidji, laate wakouma nda wahumbua, alidji wakodja wana wa Mwengei nda wana wabasi la logo.<sup>37</sup> Wango wagwi, wabase a logo, ndjongo nde Moize ayenyali engele e maa mote mokeke mungu modjali ololey, engele akowelaka likumu, Mwengei o Abalayama, Mwengei o Isaka, alidji Mwengei o Yakobo.<sup>38</sup> Kaiko Mwengei ati Mwengei e wato wagwake, kasi wango wakalake, laate iwokpaa wadjei la mokalo la loyi e inde.<sup>39</sup> Weeti wiloko e watiesakoli mibeko, watotali liloba, waasia: Mwalimo oasi olamu.<sup>40</sup> Watikokali kine omohueli te poopoo esi.<sup>41</sup> Yesu awaaselia: woni okokokani oasini ate Masiya adjei mana o Davidi? <sup>42</sup>Davidi inde amene aasi ndondo e buku ende e lembo: Likumu amwaseli Likumu la mbai: Abata la ewo e mbai e lilome, <sup>43</sup>Tee ikowumisa watonani wa owe wisuleli e makolo ma owe. <sup>44</sup>Davidi akomowelaka likumu. Ndandenge akoki odjei mana onde? <sup>45</sup>Ango edjakali wato omooki, aasia la watutiani wande. <sup>46</sup>Otuandjimeni wiloko wawatiesakoli wa mibeko; wakokpalaka walobe ilai ilai alidji owahi mibele wiholo wisungu, wakolukaka owabati la wangbeleno e liwoso la wasinagoga, la wiholo wilamu la wafeti. <sup>47</sup>Wakopwesaka wali wagweli milome wiho wau, la okeli maongi malayi malayi la tina oyayisi. Wakosambisama makasi.

## 21

<sup>1</sup>yesu atombolia maiso aenia wato wagumake wokohekeleke falanga dja makabo la ekolo e likawo <sup>2</sup>Amoenia moli mwesi ogbeli molome ahekelia wana wa falanga wale wa kekewakeke <sup>3</sup>Awaaseliate: oholo moli ogbeli molone ahekelia falanga weti wato kpa wango wabongi ewo la libenga e likawo. <sup>4</sup>Late wango wato wagumake wahekelia falanga djinge iti la otomu kaiko inde ohekelia djinge idjaki inde ladjao ongo la monguta monde. <sup>5</sup>Mbuse, ndenge weeti wato wadjali oasi la loyi e tepelo ndenge etulami eho la mabukeli malamau la iho wikipalami la likawo Yesu asiata. <sup>6</sup>Lamasio mageleli ehele tepelo ekobukia libukeli tekikima etitikala likolo leeti libukeli ehokpa ekokua sese. <sup>7</sup>Wamohuelia ate nda engele kokelama djinge sambo alidji nda elembo ekoyewesa iso ate engele eho ekokia? <sup>8</sup>Yesu awaaseliate : yabanyani ate otiwungeni, late wato ngbi wakodja la kombo e mbai wakoasaate : mbai idjei inde, alidji ate: engele eho epotia owumi. Otiwaabile. <sup>9</sup>Tango ekokani ino mboli e wita alidji wato wakoamalelanaka, otiwangakeni, laate ewongi ate djinge sambo kpa ewume liwoso, kasi eho etidja gboo e moki. <sup>10</sup>Awaaselia ate : eeti moki ekosana kindo la eeti moki, eeti okumu la eeti okumu. <sup>11</sup>Mbume ekoduduma ebete la ebete, ikoni ikodja ndenge la ndenge, mpe ndjala e ilaka ilakake, ekodja, la sambo e minga, mpe ilembo isungusu ikoenene ongo likolo. <sup>12</sup>Liwoso la djinge sambo wakoolukani ate waowoleni, wakohengelani la makunu ma wasinagoga, wakobongani la wa boloko, wakosambesani liwoso e makumu ma miki misungu, la makumu ma miki mikeke la tina e kombo e mbai. <sup>13</sup>Djinge sambo okowumelani la tina ate litatoli lanu liyewane. <sup>14</sup>Batani la mamungo manu ate otilukeni ndenge enu esambake, <sup>15</sup>Late mbai ikohekeleni maloba mpe kandela liwoso la wanguna wanu watilonga owamaleli ino, te ookokeyi. <sup>16</sup>Te wawoti wanu wakookawani, mpe wasangbanu, la wabola wanu, mpe la wato wapembeni, wakoola ngbi ndondo enu. <sup>17</sup>Wato kpa wakootonani la tina e kombo embai <sup>18</sup>Kasi mosue te mokikima mo moto monu motiwunga. <sup>19</sup>La onangi mitema manu okokalesani milimo manu. <sup>20</sup>Inga oenekeni Yelusaleme elingamia la wasoda, yewakani ate obitani oho owumiga pene. <sup>21</sup>Late wango wakodja la Judea watile ngambo emikoli, wango wakodja ndondo e Yelusaleme wapumbe, wango wakodja la ilanga watiwongwe kine la moki. <sup>22</sup>Laate ekodja masio mawongosake limemu

la oyengemani la sambo djinge idhingami.<sup>23</sup>Ekodja makpa etie wali wango wakodja la lemi, mpe wango wakonungia wana late wato wakogba ngbi, latina elimemu e Mwengei.<sup>24</sup>Wakokua la mabeha miwotake, wakokee mituke la mikikpa, Yelusalema ekowotono la wango wati Wayuda tee engele ehani la miki esile.<sup>25</sup>Ekodja la ilembo ndondo e liwusa wuse, ndondo e ndebo, alidji ndondo e minoto. Ahala la mbume miki mikodja la boo, watiyewa ndenge ekelake laate ewale ekoduduma la mbonge.<sup>26</sup>Wato wakogba la owangi ndondo e losambo enge ekodja la mbume laate okulu wolikolo wikokawana.<sup>27</sup>Wakomoene mana omoto ageli ongo la mapata, la okulu la mwemu.<sup>28</sup>Ango ekopota ino oeni djinge sambo, djambani mito manu laate mokalo munu mopotia owumi.<sup>29</sup>Mbuse awahali ekpangele eesi: Ndendani mote mo figi la mite meeti kpa: <sup>30</sup>Tango e okponaka muho ngasi ekoewaka ate engele e elanga ekokia. <sup>31</sup>ndenge kikima, inga oenekeni djinge sambo ewumia, ewani ate okumu wo Mwengei wowumia pene. <sup>32</sup>Iyowaselini meemene ehele olie otieta ndji ndjinge sambo wiume. <sup>33</sup>Likolo la mbume ikoeta, kasi maloba ma mbai matiyeta.<sup>34</sup>Angatalani inoamene laate mitema manu matilite la oetesi olaki la okengi, la mabundo ma moki, laate lisiyo luho etiowumeleni nda iwa. <sup>35</sup>Late ekoyabinga nda lisala likolo la watokpa wa mbume.<sup>36</sup>La eho oilangaleni ilo, alidji awongoni engelekpa, laate ototeni otetelake la otili djinge sambokpa igeleli, laate owawumeseni likolo liwoso e mana o moto.<sup>37</sup>La moi Yesu adjakali otiesakoli la tepelo, la likolo adjali oki olangali la mokoli mo weli iwo mokoli mo oliva. <sup>38</sup>Watokpa wadjali oki boo atiende laate wamooke.

## 22

<sup>1</sup>Lipati la mapa linge lindjangi okundji, linge liweli iwo ate Pasika, liumali ahue.<sup>2</sup>Wiloko wato wawa nganga Mwengéi la walimo wa pui wadjakali oluki ndenge eomoli Yesu, alikambo wadjaki owa wangi wato.<sup>3</sup>Ndjongo Satana alingelia la motema mo Yuda ongo omoweli iwo ate Kaliota, mwesi o watutiani wande liomu la wale.<sup>4</sup>Yuda akia okpomesani la wiloko wato wa wanganga Mwengéi ase la wiloko wato wa wamaleli monguta mo Mwengéi nda ndenge ekomokawa inde Yesu la mawo mawu.<sup>5</sup>Waumali la mwemu ase wamowunelia omohi wadjenge.<sup>6</sup>Yuda andimia, ase apotia oluki engele elamu e omokawi Yesu la mawo mawu, ndjongo wato ngbii watiewete.<sup>7</sup>Lisio e mapa edjangi okundi, use oho edjakali iwo ooli kondolo e pasika ewumali.<sup>8</sup>Ndjongo Yesu amotomia Petele la Yoani, awaselia kekeni okawongeli wilaka wa lipati la Pasika alikambo lasu.<sup>9</sup>Wamohuelia: obali ate tokawongele eni?<sup>10</sup>Inde awaselia okani! ango okolingela ino la gbata, okogbotononi la moto akpali molugu mo malia. Motutiani ebete enge ekolingela inde.<sup>11</sup>Ase asani la memene monguta, mwalimo akohuelaka ate esuki e monguta edjéi eni ebete ekolaka iso wilaka wa lipati la Pasika ebete eikima la watutiani wa mbai?<sup>12</sup>Inde akowoiniani ebete esungu la monguta mo likolo, ongondé ekowongelani ino wilaka wa pasika.<sup>13</sup>Wakia, ase wagbotia sambo kpàa nda ewaaselali Yesu ase wawongelia wilaka wa lipati la pasika.<sup>14</sup>Ango eengali engele, Yesu aabatia la mesa ebete kikima la watutiani wande.<sup>15</sup>Inde awaselia: ibalaki ngbii olaki wilaka wa Pasika ehele mongindi la ino liwoso la mbai woeni wodjidji! <sup>16</sup>Laate, iyowaselini, itilakakine tee ekoengene eho la okumu o Mwengei.<sup>17</sup>Ndjongo atotia etotu, a moongia Mwengéi ase asia: totani ehele etutu kawanani ndondo enu.<sup>18</sup>Alikambo, iyowaselini sikahala itokenga kine Vino alidi te wokoke tee ndjiango wuse wokodja wokumu wo Mwengei.<sup>19</sup>Mbuse eho, atotia mapa, mbuse eakongi la Mwengei abukia awahekelia aasia: ehele edjei wenge wa mbai ikokawa la likambo lanu; kelakanindjo la omungoi mbai. <sup>20</sup>Mbuse e olaki atotia etutu awahekelia aasia: kopo ehele edjéi wuuma woholi wo Mwengéi ehele edjéi makila ma mbai mango makosuakana alikambo lanu.<sup>21</sup>Ase dengani moto okawi mbai atie wanguna adjéi la mbai mongindji ahala la mesa! <sup>22</sup>Meemene, mana o moto akoke nda ndenge etenanate, ase maga la moto ongo omokawi <sup>23</sup>Wapotia ohuelani ndondo ewu, ndai opoti oluki okeli lungu loyi.<sup>24</sup>Watutiani wapotia okokiani makasi, alikambo la oyewi nda moto ndondo ewu odjéi moto mosungu oleki.<sup>25</sup>Yesu awaselia: makumu ma miki wakokondjaka wato wawu, la wango wakoyinyaka okulu, wawelami wakeli wa lamu.<sup>26</sup>Enge etidje ndjongo etie ino. Ase moto ongo odjéi mosungu oleki ndondo enu ewongi adje nda mana, ewongi moto ongo okohaka mitinda adje nda moto owotomu! <sup>27</sup>Ndai odjéi mosungu oleki, moto owabati la mesa inga moto owotomu? moto owabati la mesa, te ndjongo? wolamu! mbai idjéi ndondo enu nda moto owotomu.<sup>28</sup>Ino wabatigani la mbai mongindji engele elai ndondo ewomekami wo mbai.<sup>29</sup>Ndji ndjongo nda ehekeli wawa mbai wokumu, mbai pe iyohekelini ino.<sup>30</sup>Okolakani alidji okengani la mesa ma mbai ndondo e wokumu wo mbai, okoabatani likolo la ngbelengo dja wokumu alikambo la oteni loi la wiati liomu la wiale wa Isalaele.<sup>31</sup>Likumu Yesu, asia Simoni, Simoni oka! Mondjili aongiga owohehi owe nda ekoheheke wato wahehe pukapuka alikambo la odjikawi djaho la wisoki mpamba.<sup>32</sup>Ase iyakongi alikambo la owe ndjongo wondjimi woowe wotilembe; ango ekowongwa owe, waha wamangua woteteli.<sup>33</sup>Petele asia la inde; Likumu indjimi wolamu la oki la owe la woyogo mongindji, la ogui la owe mongindji.<sup>34</sup>Yesu amowongoselia: Petele, iwasele kekehele, liwoso ate koko e molome ebekwe okwasa mbala isato ate ondjewiti mbai.<sup>35</sup>Mbuse eho Yesu asia la iwo: ango iyotomeni mbai la opasa te, la saki te ase la sapato te, odjangini nda ema? wawongosia: ema teeti te.<sup>36</sup>Ase inde awaselia: ase sikahala etikine ndjongo, moto ongo odjéi la opasa, ewongi alitote, ndindjongo moto odjéi la saki ase moto ongo oti la lipata ewongi atambe kasaka ende alikambo ate asombe lipata.<sup>37</sup>Alikambo ate, yasi la ino ewongi loi luhulu wodhingama la gbondo embai wokokisame, ate inde atangemaate ndondo e wato wabe. La meemene loi wungo wodhingama la gbondo e mbai okokisame.<sup>38</sup>Watutiani wasia Likumu mapata male madjéi ahala inde asia wungo wokoki.<sup>39</sup>Apumbia, akia nda ndenge emeseni inde la mokoli mo Olive, watutiani wande wamotuteya.<sup>40</sup>Ango oumia inde la ebete eho, inde awaselia yakongoni alikambo ate otikweni ndondo eomekami.<sup>41</sup>Mbuse eho inde ayandongbia ma lihiele la iwo, akwa la mauli ase abandali oyakongi.<sup>42</sup>Wawa, inga obali longose etotu e wodidi ehele atie mbai ase atikelame nda ebali mbai ase nda ebali owe.<sup>43</sup>Ndjongo ahumbwa mwesi olikolo aumia alikambo la omohi wokulu.<sup>44</sup>Yesu aokia magba ayakongia alidji makasi oleki. Malia ma wenge mande maumia nda makila mango madokakania la mbume.<sup>45</sup>Mbuse eoyakongi inde alongoya ongo likolo, akawongoya atie watutiani, ase awagbotia walali

wilo alikambo walembali la magba.<sup>46</sup>Inde asia la iwo: alikambo lande ekolalaka ino wilo? Amalani likolo, oyakongeni, alikambo ate otikweni ndondo e womekami.<sup>47</sup>Yesu adjali wasi engele eumali wato ngbii, Yuda, mwesi o watutiani wande liomu la wale, adjali oleki liwoso inde aumia ahue e Yesu alikambo la omohi mobale mowalingi la inde.<sup>48</sup> Ase Yesu amwaselia: Yuda, okohaka mobale mowalingi la likambo la omohi mana o moto la mawo ma watonani?<sup>49</sup>Ango wato wango wadjali la Yesu mongindji iwaenia wungo loi wopotia oumi wamohulia: Likumu, ewongi tosane la mapata masu?<sup>50</sup>Mwesi owu amokotia moto owotomu onganga Mwengéi mosungu, ase amotenia litoi.<sup>51</sup>Ase Yesu asia: Otkeleni ndjongo dheni. Atotia litoi e moto oho, ase awngosia.<sup>52</sup>Mbuse eho, Yesu asia la wiloko wato wa wanganga-Mwengéi, ase la wiloko wato wawadendji wa monguta mo Mwengéi ase la wiloko wato wango wadji omoheli inde: Ogelelini la mapata, la mite nda idjéi iwa? <sup>53</sup>Masio kpaa idjaki la ino mongindji ebete eikima la monguta mo Mwengéi ase otipotalini oheli mbai, ase ehele edjéi engele enu la engele ewokumu wo likolo.<sup>54</sup> Wamohelia yesu wakia la inde wakamotikia la monguta monganga Mwengéi mosungu. Petele amotuteya, ma lihele mbuse.<sup>55</sup>Ase ndondo egbingi waloliali misa, ase Petele ayabatia ndondo e wato wango wakotoko misa.<sup>56</sup>Moto owotomu mwesi omoli amwenia Petele ayabati kelekele emisa, inde amodendjia Petele makasi, ase asia: oholo moto koto adjaki la Yesu mongindji! <sup>57</sup>Petele amokokiali, aasiali: moli, imwewiti.<sup>58</sup>Mbuse eho moto odi amoenia ase asia: owe koto odjéi mwesi owu.” Ase Petele asia la moto oho ate; iti inde te.<sup>59</sup>Pene la engele esi mbuse, moto odji asia makasi: memene oholo koto adjaki mongindji la inde alikambo ate inde adjéi moto o Galilaya.<sup>60</sup>Ase Petele asia la moto oho yewiti wungo loi wokwasaka owe. La engele eho anga edjakali inde wasi koko e molome ebekoiya.<sup>61</sup>Likumu ayakukolia, ase amodendia Petele makasi ndjongo Petele amungolia loi wungo wasali Likumu lainde: Liwoso koko e molome ebekwe okowungana mbai mbala isato ate ondjewiti mbai. <sup>62</sup>Petele apumbia ase alelia la magba.<sup>63</sup>Wato wango wamosekeli Yesu, ase wamobingia.<sup>64</sup>Wamodhihia maiso ase wamohuelia: towasela inso inga ndai oobingi? <sup>65</sup>Ase wasia lainde sambo ngbii dja wiliko.<sup>66</sup>Wuse wotania wiloko wato wa wa Yuda, wiloko wato wawanganga Mwengéi la walimo wa pui wagbotononia wakadjia la Yesu liwoso la wabolei wou wosungu.<sup>67</sup>Ase wamohuelia towasela iso odjéi Masiya? inde asia la iwo inga iyasa laino, otondjimini mbai. <sup>68</sup>La inga yohuelani poopoo otowongoselani mbai ema. <sup>69</sup>Obandji ndji keke, mana o moto ekoabata la ewo e lilome e Mwengéi eowokulu. <sup>70</sup>Ndjongo wato kpaa wahuelia odjéi inde mana o Mwengéi? inde awawongoselia iwo: Owasisani, idjéi inde. <sup>71</sup>Ndjongo wasia: Todjeikineni la posa e wadhemei? Tooki isoamene la monoko monde.

## 23

<sup>1</sup>Wayamalia iwo kpaa wakia la Yesu ongo edjei Pilato. <sup>2</sup>Wabandali omokambi waasali ate : tomogboti oholo moto ndjo akwasaka la wato ate watindjime mibeko ma Moize, alidji watipute mamelo e Sezale, akwasaka alidji la wato ate inde adjei kilisito, likumu. <sup>3</sup>Pilato amohuelia : owe nde likumu la wayuda? e edjei mabi, owasiga koto. <sup>4</sup>Pilato asia la makumu ma wanganga Mwengei, la wato kpaa wadjaki anga: iyeniti loi ungo okeli oholo moto. <sup>5</sup>Kasi wamwamalelia waasia ate : akowatomaka wato la oya maleli mateya ma Moize obandi la yudea, galilea tee alandjo. <sup>6</sup>Ango eokia pilato ndjongo, ahuelia inga inde adjei moto o galilea; <sup>7</sup>Ango eokia inde ate adjei moto o sese e okumu e Elode, amotomia ongo edjei Elode, laate mango masio Elode adjakali la Yelusalema. <sup>8</sup>Ango Elode amwenyia Yesu, aemelali laate tee la gala adjali la posa e omweni la djinge sambo edjakali inde ooki, adjakali omolambeli ate amokelele ma ema ekamwesake. <sup>9</sup>amohuelia poopoo ngbi, kasi Yesu atiwigolali loyi te okikima. <sup>10</sup>Makumu ma wanganga Mwengei la watiesakoli wa mibeko wango wadjakali anga, wadjali omokambi la sambo mbe mbe. <sup>11</sup>Elode la sindjili djande wadjakali omokeli sambo mbe, la omoseki. Mbuse e omokpalesi esindje etanake, wamowongosia Yesu etie Pilato. <sup>12</sup>Ndji ungo use, Pilato iwo la Elode waumali wa bola, iwo wato wango watonanali iwo wale mbuse e mbula ngbi. <sup>13</sup>Pilato awaboliali makumu ma wanganga Mwengei, la watiesakoli wa mibeko, la wato; awaaselia: <sup>14</sup>Ino odjelelini mbai oholo moto, owasiani ate akowatomaka wato ate wamalele mibeko ma Moize, kasi imohueli liwoso lanu, mpe itimoene la likambo te likikima e sambo djinge emokambini ino. <sup>15</sup>Te ongo kine etie Elode, laate atowongwesi, dhenda oholo moto atikele ema enge ekoki la inde la logo. <sup>16</sup>Kasi mbai ikomopumbesa la boloko mbuse e omobingi pimbo <sup>17</sup>Yenga kpaa edjali mobeko ate wapumbesake moto mwesi la boloko ate wamoole. <sup>18</sup>Iwo kpaa wahumbali pui: moolesa Yesu, todheela Balanabasi. <sup>19</sup>Balanabasi alingelate la boloko la loyi e olake wato la djete sambo mbe mbe. <sup>20</sup>Pilato aasia alidji la iwo laate amodhe Yesu. <sup>21</sup>Iwo kpaa wapamia la moli motetelake, wasia: agbe, agbe la ekulusu <sup>22</sup>Pilato awaselia, mbala esato : nda obe okelinde? iyeniti loi ungo oki inde ogbi, ikomodhe mbuse e omobingisi pimbo. <sup>23</sup>Kasi wapamia la moli motetelake ate agbe, opami owu obolianali la enge e makumu ma wanganga Mwengei. <sup>24</sup>Pilato andjimia owahi enge e ongi iwo. <sup>25</sup>Amopumbesia moto ongo odjakali la boloko la sambo mbe mbe, mooli o wato; awahekelia Yesu la posa ewu. <sup>26</sup>Ango odjaki iwo oki la inde, la mboka, wagbotonia la Simona mo Silene, adjakali owongoyi la ilanga, wamokpalesia ekulusu, late amoikele Yesu ongo mbuse. <sup>27</sup>Edjakali la wato ngbi wango wadjakali omobileyi, wali wadjali oyabingi mikpoto, la ooki magba la tina ende. <sup>28</sup>Yesu ayakukolia asia la wango wali ate: wali wa yelusalema, otileleni la tina e mbai, lelani la tina enu amene la wana wanu. <sup>29</sup>Late la masiyo mango mageleli wakwasia ate : mwemu la wali wango wikomba, mwemu la wali wati la wana, la wango watinungisaka. <sup>30</sup>Wakoyabata oasi la mokoli ate : tokpele, alidji la milindalinda, todhiha! <sup>31</sup>Inga wakela dji sambo la mote mowesi, ekodja woni la mote moomake? <sup>32</sup>Wadjakali pe oki la wato wale wango watingakali la iwo laate wawabake ebete ekikima la Yesu la ekulusu. <sup>33</sup>Ango eumia iwo la enge ebete eweli iwo ate mikwa ma moto wamobakia Yesu la ekulusu ebete ekikima la djinge iwa, mwesi la ewo e lilome odji la ewo e liali. <sup>34</sup>Yesu asali: wawa walimbasa, la loyi wayewiti ema enge ekokelaka iwo. <sup>35</sup>Wato wayamalali lihele wakowadhenda. Watiesakoli wa mibeko, la wango wadjakali anga, wadjakali omoseki Yesu, la oasi ate: awakalesali weeti wato; ayakalese inde amene inga adjei Masiya ongo owononi la Mwengei! <sup>36</sup>Wasodha koto

wamosekekeli, wakia ahue ende, wamohiya mana magagake. <sup>37</sup>Wasia la inde ate: inga odjei likumu la wayuda, yakalesa yo owe amene! <sup>38</sup>Edjakali likolo lande madhingo mango madhingali iwo : oholo adjei likumu la wayuda. <sup>39</sup>Moto moesi ongo omobakali iwo la ekululu ebete ekikima la yesu, amotangia asia ate : te owe nde kilisito? yakalesa yo owe amene, mbuse otokalese! <sup>40</sup>Ongo eti amowongoselia : owe otimowangaka Mwengei? iso kpa todjei la odjidji okikima. <sup>41</sup>Laiso, ekoki ate togbe la loyi tokelali obhe, kasi inde akeliti loyi te lokikima. <sup>42</sup>Asia la Yesu: mungolaka mbai ango ekodja owe la okumu wowe. <sup>43</sup>Yesu amowongoselia : iyowaseli meemene ndji keke ehele okodja la mbai ebete ekikima la Paladizo <sup>44</sup>Edjakali ango la engele e motoba likolo lilingelia la moki kpa tee la engele e libwa. <sup>45</sup>Moi molimanali, esindje e Tepelo esalanali la odja. <sup>46</sup>Yesu apamia la moli motetelake aasia: wawa iwongosi molimo mo mbai la mawo ma owe. <sup>47</sup>Ango enia sindjili ndjongo, wamodemeiya Mwengei, waasia: oholo moto adjaali sembo. <sup>48</sup>Wato kpaa wango wadjakali ango mbuse e oeni djinge sambo, wawongoyia wakoyabinga mokpoto. <sup>49</sup>Wango wato kpa wamoewakali Yesu mpe la wali wango walongwali, lainde tee la Galileya, wayamalali maa lihele, wakodhendaka djinge sambo edjakali oyeti. <sup>50</sup>Edjakali la moto mwesi ndondo e wahi simbisi, moto osambo ndamu, kombo e inde Edjepu. <sup>51</sup>Inde atiyawanesali la mungo mobeko, la djinge sambo, adjali moto o moki mo Alimateyo, liwange la wayuda, inde adjaali olambeli okumu wo Mwengei. <sup>52</sup>Akeli ogbotoni la Pilato, aongia wenge wa Yesu. <sup>53</sup>AmodjimBali la ekululu, alingali eho la bolangiti, akeli omolangesi a mbila enge ekelami ndondo e mabhukeli, enge watimolangesaliyo moto tueti. <sup>54</sup>Edjakali use elengelake sabata <sup>55</sup>wali wango walongwali la Yesu tee la galileya wakia la Edjepu ebete ekikima la omokundji Yesu. <sup>56</sup>Ango ewongoyia iwo, wawongelia malasi. Lisiyo e sabata wahomali la ndenge edhingani la mobeko.

## 24

<sup>1</sup>Lisiyo la yenga ,wakeli la hilihili ongo la mbila,wakpali isokisoki elumba elamu enge ewngelali iyo. <sup>2</sup>Wagbotoli libukeli lilongoyi liwoso la mbila. <sup>3</sup>Walingelia, watigbotoli wenge e likumu Yesu. <sup>4</sup>Ango etidjake iwo oyewi inga enge sambo eyinyei woni,denda walome wale wawapumbelali,wakpali wisinje wingalake. <sup>5</sup>Watumali la owangi, wayimali wilongi wawu la mbume. Wango pele wawaselia: woni okolukakani moto omokalo ono wato wagwi? <sup>6</sup>Ati ala, abasi. Sumbwani enge awowasellate ino,engele edjaki inde la Galileya. <sup>7</sup>Ekoki ate mana o moto wa mokawe la mawo ma wato wabe, wamobake la ekululu, abase lisiyo la misato. <sup>8</sup>Ango wadjaali alidi obundoyi maloba ma Yesu. <sup>9</sup>Tango ewongoiya iwo la mbila, wasumbia djinge sambo kpa la watutiani wande liomu la esi alidji la wato kpa. <sup>10</sup>Waango wadjali osumbi enge mboli la wa posotolu, edjali Malia magadala, Yoana, Malia nango Yakobo alidji la weeti wali wango wadjaali la iwo. <sup>11</sup>Kasi waokali djinge sambo nda pamba, watidjali owandjimeli wango wali. v 12 Ase Petelo ayamalalia, akia obangu ongo la mbila. Ayayimbia , ahenia ndji isuki dja isindje ekwi la mbume, mbuse awongoiya atiende, akobunduaka la djinge sambo ewumi. <sup>13</sup>Ndji enge lisiyo, watutiani wale wakeli la moki mwesi moweli iwo Emawusu lihele la Yelusaleme inga wakilometele liomu la iwale. <sup>14</sup>Wadjali owasi iyo kpa djinge sambo iyeti. <sup>15</sup>Tango edaki iyo okpomi la owasani, Yesu ayandokpia inde amene, akia la iwo mongindji. <sup>16</sup>Kasi maiso mawu mawatekisali ate watimoyewe. <sup>17</sup>Yesu awaaselia: okowasakani nde la okosombakani, alidji odjeini la ilongi emagba? <sup>18</sup>Mwesi la ewu kombo ende Kelopasa, amowongoselia: odjei owe amene maamasioyo ala la Yelusaleme ongo oyewiti djinge sambo eeti maamasio? <sup>19</sup>Woni? awahuelia. Wamowongoselia: enge e mowumeli Yesu o Nazaleta,ongo odjakali mwaseli ookulu la sambo la oasi liwoso la Mwengei la liwoso la wato, <sup>20</sup>Ndenge wiloko wa wakanga Mwengei la wa zuzi wa su wa moheli laate wamowole wamobake alidji la ekululu. <sup>21</sup>Todjaki oyewi ate inde moto akokaki okalesi Isalaye, kaiko la djinge kpaa,denda keke ehele masiyo masato djinge sambo ikelani. <sup>22</sup>Wali wesi la mongindji mosu watokamwesi. Waki la hilihili ongo la mbila. <sup>23</sup>Kasi watigbote wenge wande ; wadjali oasi ate waahumbwa wawawimeli, wawaaseli te adjei la bomoyi. <sup>24</sup>Aseko weeti la ndondo e wato wango wadjaakali mongindji la iso wakeli la mbila eho, ase wagboti ndji ndjongo nda ndenge wango wali waasi kasi wati moene. <sup>25</sup>Ndjongo Yesu awaaselia ate: wato wandjangi mayele, wango mitema mawu militi la ondjimi djinge ehasemate la waaseli! <sup>26</sup>Etihongoli ate Masia aene odidi la dji sambo laate alingele la elolo ende? <sup>27</sup>Obandi la madhingami ma Moize, oki la waaseli kpaa, awaaselia ndondo e madhingami kpaa djinge sambo ewadhendali. <sup>28</sup>Ango eyandongbali iwo la moki modjali iwo oki,Yesu alukali oki nda ma lihele. <sup>29</sup>Wamotekisali la oyakongi, waasia: tikala la iso laate likolo lipotia oli. Alingelia la iwo. <sup>30</sup>Aseko ango eyabatali inde la iwo la mesa, atotia okoke eowasi yongolo eopamboli, abokia eho, awahia. <sup>31</sup>Ndjongo maiso mawu madukwania, wamoyewia, a salamatia liwoso la wu . <sup>32</sup>Ase wayaaselia ate: mitema masu mitidjali obingi ango edjakali inde otowaseli a mboka la otoyignei madhingami. <sup>33</sup>Wayamalali ndji enge ngonga, wawongwali la Yelusalema, ongo wawagbotoli wango liomu la esi la weeti ongo eyabondali iwo. <sup>34</sup>Wawaaselia ate: likumu abasi meemene, ayeneni pe la Simoni. <sup>35</sup>Asa watutiani wawaaselia djinge sambo ewawumelali la mboka, la ndenge emoyewali iwo Yesu engele ebuki inde okoke. <sup>36</sup>Ndji edjaki iwo owasi Yesu inde amene awapumbelia liwoso lawu awaaselia: logoo edje la ino. <sup>37</sup>Watumali la owangi wayewali ate waeni etota. <sup>38</sup>Awaaseli: woni ekowangani ino? alidji woni maa mamungo mbe makoyabataka la mitema manu? <sup>39</sup>Denda mawo ma mbai la makolo ma mbai, edjei meemene mbai. Potoni mbai alidji dendani: etota ti la wini la kua, la ndenge ekohenekeni ino, mbai edjei la eho. <sup>40</sup>Ango eyasia inde ndjono, awaanesia maho mande la makolo. <sup>41</sup>La eho,la oyemeli owu, watidjaali ondimiyo,wadjaali okamwi. Ase awaaselia: odjeni la ema e lakake ahala? <sup>42</sup>Aseko wamohekelia esuki e su e ndjomake. <sup>43</sup>Ase atotia ehoo ase alakaki eho la maiso mawu. <sup>44</sup>Ase awaaselia ate: edjei ehonde iyoowaselalini ango edjaali yo mbai la ino: ewongoli ekokesame dji sambo kpaa edhingani la tina e mbai ndondo e buku e mibeko e Moize, la waaseli,la ndondo e lembo. <sup>45</sup>Ase awadukolia mayele laate wayewe olamu madhingani. <sup>46</sup>Ase aasia laiwo ate: ndjongo e dhinganaali ate,ekoki djinge sambo ewume, ate Masia onyokwame; agwe ase asuswe mbuse e masiyo masato. <sup>47</sup>laate alikambo la kombo ende okukoli mitema la olimbesi masumu ekoke otiesakolami laa miki kpaa, opoti ala la

Yelusaleme<sup>48</sup> Ino odjeini watotoli la djii sambo. <sup>49</sup>Denda ikootomelani ino enge wawa awunate; la ngambo enu, abatani yo la moki mo Yelusaleme tee ekokpalani ino okulu o likolo. <sup>50</sup>Akia la iwo tee ongo la Betania, aseko mbuse atombolia ewo likolo, awa pambolia. <sup>51</sup>Ango adjali inde owapamboli, akawania laiyo ase abamdia otehi likolo. <sup>52</sup>Aseko iyo mbuse eomodemei, wawongoiya la Yelusaleme, watumali la oyemeli. <sup>53</sup>Wadjali engele kpaa ongo la tepelo, odemei la opamboli Mwengei.